

皇華集序

皇帝位九五之初大誥四方萬國與天下更

始以我國世守侯度秉禮惟舊於是

選於朝以右春坊右庶子

董公為之使貳以工科右給事中

王公捧

綸音沛

鴻恩我

殿下對

天威如咫尺歆



使華之文雅肅敬將禮既

謂左右若曰

帝眷小邦今茲

繼統出政之始而

特命經幄之臣金閨之彥如

兩公者來覃施

德意使我東人有所矜式其為

賜重矣然

兩公不可留則其所留詩若文宜取以  
為集以壽其傳以寓景仰之思仍

命

臣序之

臣

竊見雙鳳聯翩口嚙芝詔

出自丹霄止於青丘者

兩公之儀度也珠璣錯落卷軸連車提

封萬里盡入牢籠者

兩公之詞藻也則

兩公雖不可留而

兩公之所留之者大矣

臣

嘗讀詩至皇

皇者華則知遣使之重四牡駢駢則

知勞使之切且孔聖以使於四方不

辱君命為士之才古之人未嘗不以



使職為難而能稱其職者蓋鮮雖有能稱其職者能賦其雅章而彰

國家之盛美者尤亦鮮矣今

兩公溫厚之資宏偉之器加之以積學之功涵養之深所際者

文明之時所處者清切之地故其施諸事也言中度而行中禮其發於詩也雄渾而雅精深而暢雍雍乎足以鳴大雅之隆噫

兩公之來也益有以知

聖朝人材之懿治教之休而

兩公使乎之才無讓於皇華四牡之大夫矣豈但使四方不辱君命云乎哉而況江都經術世稱其醇河汾道學講之有素將見已事西歸敷奏

彤墀

錫三接之榮

慰萬里之行由是而躡台階調玉燭笙鏞

治道黼黻

皇猷翹足可俟若夫采詩置官王者所以觀



風俗考得失也然而有天下之作有一國之作有周之盛有皇矣大明之雅而聖人採之不遺乎曹檜之風吾東方藐在荒服之外因是編之行而得列於

皇明風雅之末使天下後世知東方之有國亦得漸濡於

皇明聲教之中如是也

臣

謹筆之以弁卷首

弘治元年蒼龍戊申冬十月下澣資憲大夫兵曹判書兼世子右賓客弘

文館提學藝文館提學魚世謙謹序



皇華集上

入東國來覽途次山川時有所得至  
晚輒復忘去偶記一二用錄求教董  
越頓首黃門王先生

車輦館蟠松

董越

偃蹇槎牙出道周層霄白日見蟠虬炎  
蒸謾逼三庚伏爽氣常從六月浮青蓋  
曉隨

天使節驚濤夜泛海門舟楫材曾上徂徠頂  
回首丘山憶萬牛



郭山孝女

曾讀文僖孝女詩久知東國重民彝  
死生已落千年夢表樹猶存三尺碑  
雲鎖北山天漠漠水聲南澗草離離  
經春使節還過此欲繼前人覺思遲

新安館即事

弭節臨山館張燈夜燕時  
通言雖用譯卻樂不煩詩  
館伴先知禮從行亦有儀  
因思

聖明化元不隔藩籬

渡大定江

過盡崔嵬幾日山馬頭驚喜聽潺湲  
澄涵上下碧千頃橫界東南玉一灣  
搖曳正聯青雀渡驅馳不似白鷗閑  
滔滔莫道渾無以曾共仙槎萬里還

登百祥樓

晴川高露碧崔嵬此日登臨亦壯哉  
水漾鳬波清且淺雲隨鳥翼去還來  
一簾香霧濃陰合四面青山罨畫開  
使節東歸應指日與君重上醉餘杯



三月朔阻雨安興館謾錄

蟠松次韻

王敞

老幹重陰匝四周翠濤深處擁蒼虬根  
盤屈鐵經霜古影落寒潭盡日浮海錯  
盤擎絲作膾瓷罌酒薦玉為舟德星此  
日三韓聚應有虹光射斗牛

飲松下  
故云

時許判書  
出盤脩小

琮頓首

皇華內翰大人不鄙遠人辱贈佳什盥  
手展誦如得拱璧琮少事詩書既

筮仕鞅掌職事久廢筆硯何以仰  
荅

雅意然重違

嚴命僅掇荒句希賜一粲

車輦館蟠松

許琮

托根官道幾星周老幹輪囷卧翠虬  
石齒碎江風力峭蒼髯蒙霧曉光浮  
曾迷白鶴三秋夢堪作黃龍萬斛舟  
夜靜空山明月吟欲隨雷雨化青牛  
郭山孝女



女中純孝類姜詩一片衷誠自秉彝  
水繞山圍虛故里風磨日炙只殘碑  
雨餘草樹增青翠日暮雲霞更陸離  
玉署名賢來駐節却尋遺跡得歸遲  
新安館即事

丹山瑞世鳳雲路際明時

闕下初銜命周南為採詩文章唐製作冠冕

漢威儀應咲山翁醉臨風倒接籬

渡大定江

一派來從塞外山西流百折送潺湲

煙拖松影迷青嶂風送桃花漲碧灣  
草合芳堤鷗睡早天空絕塞鴈飛閑  
金閨多少

皇華使此地星輶幾往還

登百祥樓

草樹淒迷石磴嵬雕闌十二興佳哉

鳳銜

丹詔從

天下鼇戴青山跨海來落日蒸紅雲

葉晚長風捲白浪花開羅衫斗覺春

寒緊為向尊前送一杯



吏曹出佳句雨中見留因足成一絕  
且索內翰董先生一和王敞

天教好雨留佳客

帝遣詞臣下碧蹄但使肩輿能代步不妨險  
路更衝泥

次韻

許琮

螭頭朝退午門西香土東華散馬蹄  
兩袖忽擎

鸞詔至晴霞五色濕金泥

黃門足吏曹詩意似絕而實有天然

對偶者存因續貂尾以紀一時

董越

塵迷墟莽須滋浥暝落林花足品題拂  
曙山巔定紅日行人休聽鷓鴣啼

次韻

許琮

韶光如酒着人迷謾把霜毫取次題  
山北山南春雨歇隔林紅日鷓鴣啼  
三月朔安興館遇雨予將促行許吏  
曹命譯者苦留且屢有天教好雨留  
佳客之誦因摘為六言七首用博一



粲

董越

煌煌使節東指戀戀丹心

北懸阻客忽驚朝雨舉頭欲問青天

去去敢辭體倦行行恐負邦交漢署編

摩久待周南留滯誰教

君門雨露同承客路冰霜共保從教百尔能

留不似一行尤好

承

息獨愧尋常計日兩經三五夜來客館衾裯

夢斷林臯煙雨

幾日長亭車馬三春高閣置郵怕聽山

中格磔愁聞柳外栗留

山頂全無斤堠林間只見人家風物撩

人不盡壺觴勸客尤佳

簷前急雨翻盆頭上濃雲潑墨主人想

已禱祈愛我於焉嘉客

中書君已老而禿甚不奏功况值我

疾行殊無好步二妙之來益見涇渭

聊以荅意諒不外也越又頓首黃門

王同事先生



安興雨阻許判書誦天教好雨留佳  
客句余以絕足之董先生復每字押  
以六言一首遂賡之於後 王敞

山路衝泥滑滑歸心入夜懸懸安得倚  
空長劍肯教纖霧遮天

賓館只宜禮飲王臣豈可幣交東行萬  
里誰顧暫留一日天教

鶯花三月誰游遠道一身自保北堂入  
夜興思東歸指日纔好  
乘槎遠笑張騫歇後還思鄭五清江兩

岸人家喜殺一犁春雨  
策馬纔過東站樞衣便見督郵倦客擁  
衾高卧主人投轄能留  
山路盤盤鳥道溪流曲曲人家高閣坐  
來稱快晚山一望尤佳  
常時懶就詩篇此日纔拈筆墨不辭遠  
路賢勞應笑常年為客

次韻

許琮

遼海軒車輒駐玉堂魂夢長懸回首  
歸鴻沒處黃雲白草連天



學士金鑾大老古人黃卷神交咨詢  
原隰靡鹽樹立勲名早教

德音忽布遐方皇雅宜歌天保海山隨處堪

留點檢風光也好

林花白白紅紅遊騎三三五五恠來  
滿眼韶光昨夜一天風雨

黃道新瞻

日馭青丘遠遣星郵眷我褒衣博帶愛之安  
得遲留

罕确坡頭村路微茫沙上漁家藍輿

細雨鳴處收拾清詩儘佳

醇儒學貫天人良史名高翰墨竭來  
海上觀風人導好看此客

喜晴復用前韻謾成七首

王敞

雨脚沈沈低墜心旌曳曳高懸新柳條  
垂江岸落霞光射晴天

點水漁舟泛泛轉枝黃鳥交交煙雨撲

簾可厭紅塵拂面寧教

誰言伯夷能廉自笑曾參可保四知弗  
受堪誇一硯不持更好



鴨江遠路三千鳳閣去天尺五不辭涉  
水登山却喜清塵微雨  
海氣遙連薩水湖光絕類高郵為愛層  
樓空濶不堪酒盞淹留  
雨歇裁詩排悶夢回歌枕思家白鳥飛  
來還去青山洗後尤佳  
東行何止千山到處曾題一墨任他管  
見儒生笑我無能狂客

次韻

許琮

半嶺斜陽欲沒一眉新月高懸興至

悠然倚杖隔林啼鳥春天

桃花巷陌紅糝楊柳池塘翠交行止  
詎云天定淹留或使人教

百歲黃梁未炊是身憂樂難保向來  
水色林光春欲暮時方好

皇風暨北漸東

帝德登三邁五使者來頒

詔書隨車忽霈甘雨

輓輟論思

經幄久勞車騎馳郵應念局中文會那教海



外乞留

白鷺翻飛細雨青林曲抱村家此間  
詩語能妙晴後山光更佳

襖牋雲靄春空拈筆鴉棲醉墨東人  
拭眼爭看信是金門羽客

次喜晴六言疊韻

董越

簷外飛孫已斷山顛瀑布猶懸愁殺悠  
悠去路忽瞻蕩蕩遙天

二月風光已過暮春節候初交迢遞沂  
濱莫到馳驅箕甸從教

從來行止非人明日陰晴未保不於客  
路懸情豈識斯言最好

寒雞喔喔聞三戍鼓聲聲報五夢回青  
草池塘腸斷綠荷風雨

雨樹已為晴樹後郵又作前郵最愛肩  
輿便捷不教半步遲留

短見每憐渠輩大方今屬君家話久精  
神倍爽詩來楮墨尤佳

遙遙緩步安車落落客卿子墨青山謾  
笑行人何處獨無愁客



次韻

許琮

金馬玉堂地禁銀魚紫綬腰懸功名  
正自來逼萬里鵬搏九天

傾蓋似曾相識盍簪正可論文高樓  
綠酒紅燭歸騎忽忽莫教

風流玉署神仙道德

青宮傳保海底手傾蛟盤明珠箇箇俱好

金閨鳳舞一雙

紫極龍飛九五忽聞泥緘下天江頭候騎如  
雨

白霄玄菟路遠東來二十八郵鑾坡

歸夢一覺兩袖天香尚留

東風舊雨今雨西崦三家五家蒼壑

忽回馬首野桃山杏皆佳

晴虹萬丈飛空鹽紙香生寶墨玉斧

繡衣使者丹臺紫府仙客

登百祥樓

王敞

江雲樹影共悠悠萬里風煙豁壯眸

紫禁遠連天北極夕陽閑倚郭西樓微茫弱

水通玄圃咫尺扶桑隔鳳洲我欲天涯



窮勝槩一杯消盡古今愁

次韻

許琮

早世功名不謬悠東來隨處展雙眸  
胷中必種千苗玉手下應修五鳳樓  
綺席淋漓傾白墮雲山指點認玄洲  
潮來定有蓬萊信莫向斜陽起遠愁  
越素性不喜作詩有使事來日惟知  
以急

君命為念殊無暇役志於風花三月朔滯雨  
安興許吏曹留之甚力既屢誦天教

好雨留佳客之句以感予乃用摘其  
字為六言詩七首謾錄求教反蒙賜  
和入夜仰瞻霄漢喜解剥雲陰明日  
東奔蓋未占而有孚者復成二律志  
喜希賜教焉

細雨簷花濕未收燈前相對思夷猶新  
晴夜報勞鍾鼓碧漢星瞻見斗牛鬣鬣  
曉風隨使節瞳瞳初日上簾鉤

天心應念馳驅久不遣皇華更滯留

候館寒燈未落花曉鍾有雀噪簾牙沙



堤得水偏驕馬池草經春未聽蛙為客  
每驚時序改兼程肯信道塗賒

賢王拱

極心方切祇恐頻勞候使華

老生董越再拜黃門王先生吟伯初  
稿字多塗抹覽畢幸見擲回

次韻

許琮

城上雲煙散不收為教華節輒夷猶  
人生本是戰蠻觸世事真如風馬牛  
江柳搖春縈玉勒海霞伴日照金鉤

感時對景須行樂尊酒何妨處處留  
腹有詩書筆有花勲名不日建高牙  
文章共說關西鳳朴簌深慙井底蛙  
雨厭花枝低復舉雲遮山色近還賒  
前途此去千餘里拭目人爭看  
使華

平壤城謁箕子廟二首

董越

象箸當年託意深臺池那復救荒淫誰  
云被髮佯狂態不是捐軀獻靖心禹範  
一篇陳大道東人千古仰遺音偶成歇



馬瞻祠廟桂酒椒漿且一斟

玉馬西周不共朝冠裳東國儼清標高  
風謾說凌三代遺教猶聞守八條廟古  
松枝惟有鶴林深桑椹已無鴉驛程旋  
節三春暮幾欲臨風賦大招

次韻

許琮

瑤琴一曲意何深可忍君王恣偃淫  
麥秀殷墟空慘目茅分海國肯甘心  
書陳八政思傳法名列三仁遇賞音  
日暮空庭山雨下只將明水喚人斟

孤忠終不向西朝盛德長為萬世標  
古碣倚牆微有字寒松溜雨半無條  
崗巒斗起傳名兔草棘叢深不萃鴉  
擬作廟中迎送曲臨風不用楚辭招

墓在城西  
兔山上

謁箕子廟

王敞

眼看九廟便淪污萬國嗷嗷怨獨夫但  
使一言能悟主敢論諸父久為奴下車  
見訪周王日洪範聊陳大禹謨一脉斯  
文傳海外肯騎玉馬過東都



拒諫荒淫不忍聞幾年縲紲敢忘君鉅  
橋有粟嗟誰食寶玉空衣愧自焚一木  
豈能支大廈九疇何幸託斯文武庚他  
日還薰粉始覺佯狂誤老臣  
昧爽前徒忽倒戈三分天下盡消磨新  
封遠賜朝鮮地故國空遺麥秀歌青史  
大名垂汗簡碧山古廟偃松蘿勞勞今  
古多成敗閒看江雲逐逝波

次韻

許琮

疆韻之和非大手不能然大人有

命義不敢辭謹錄奉求教

由來哲婦作干戈殷鑑分明久不磨  
終古有人悲曲操至今無酒酹朝歌  
新祠是處著蘋藻故國遺墟長薜蘿  
想見當年無限思繞城唯有水生波  
處身皆是厭卑污可惜佯狂作匹夫  
隱忍苟存非愛死彷徨不去任囚奴  
明夷在易成爻象皇極終天炳聖謨  
餘業未能傳萬代江山空自說西都  
三仁行迹聳前聞惻怛應同各愛君



四海有心歸聖德一身無力救兵焚  
八條教法能傳世萬古流風煥有文  
大道在余寧可泯受封非是作周臣

渡大同江

董越

曉風吹上木蘭舟倚棹停杯看碧流汀  
樹帶煙迷渡口漁蓑衝雨傍磯頭冰盤  
膾斫銀絲細石鼎茶翻雪浪浮已遣前  
驅戒行李一尊仍為主人留

次韻

許琮

悠悠身世一虛舟穩泛滄江萬里流

雉堞倚雲聯鴈齒鷗波袞雪暎螭頭  
青連平楚煙光合黑入中流暝色浮  
自是尊前情繾綣肯緣光景為遲留

渡大同江

王敞

清尊消白日錦纜下樓船沃壤連平壤  
江天作雨天花明春欲暮沙暖水生煙  
勝槩歸題品狂歌一叩舷

涓水元歸海山城半入江春潮翻石壁  
飛雨打船窓作賦才誰健凌雲意未降  
濟川輸董相不日看經邦



次韻

許琮

海近潮平岸風生浪逆船鷗來迎玉  
節帆去觀雲天細雨全沈樹孤城半  
帶煙滄洲興不盡臨去更憑舷  
鳴鴈去尋塞飛花吹度江風光收客  
橐笑語出僧窓雲路人爭羨詩壇孰  
不降千金雖未費珠玉散東邦

登浮碧樓

董越

傑棟層簷出薜蘿凭高一望意何多  
遠峯秀聳郎官筆斷岸斜穿織女梭  
江雨

釀寒來樹杪嶺雲分暝落巖阿悠悠不  
盡登臨興又上蘭舟聽棹歌

穿雲尋石磴衝雨上高寒樹色凌飛翼  
江聲入畫欄誰教風力峻自覺酒腸寬  
黃鶴磯邊意分明付大觀

次韻

許琮

宰雲危構蔭煙蘿濕翠溶溶拂袖多  
遠岫和空迷鳳髻斷雲拖雨起龍梭  
數家茅店臨江渚百道苓泉落澗阿  
安得月明携笛去倚闌重聽扣舷歌



層崖高疊翠小雨送輕寒白水三千  
頃紅樓十二闌鴈飛沙磧遠鶻沒海  
天寬世事江聲外悠悠獨靜觀

登浮碧樓

王敞

山閣凌空起孤雲挾雨飛好花臨驛路  
小艇占漁磯石磴斜通郭煙村半掩扉  
主人留客意薄暮肯言歸  
輕陰時作暝斷岸且維舟不意皇華使  
真成赤壁遊江山供老眼酒盞散春愁  
花柳如相待東歸盡日留

次韻

許琮

渚草平如剪江雲濕不飛綺霞飄酒  
席桃浪濺苔磯古寺蘿垂壁漁家水  
入扉眼前多少景惆悵客將歸  
際野迢迢岫橫江點點舟百年逢勝  
賞千里伴清遊柳嫩枝枝好花殘片  
片愁雲煙如有意未許暫相留

松林晚照

王敞

空山落日翠煙微點點歸鴉向北飛坐  
久酷憐風景好春寒不覺透羅衣



次韻

董越

盤礴松陰坐翠微  
隔林斜日亂煙飛  
江南三月無邊景  
到此偏傷未拂衣

仰次高韻伏希一粲

許琮

青煙喬木遠稀微  
落日天低一鴈飛  
為愛蒼官仍坐久  
近山嵐氣濕人衣  
一村桑柘夕陽微  
芳草萋萋柳絮飛  
已過蘭亭修楔後  
風寒猶未着春衣

登鳳山樓一絕

董越

鳳山樓頭坐日斜  
煙橫雉堞迷歸鴉  
春

深晝靜人不到  
開徧滿林桃杏花

次韻

許琮

獨倚雕闌帽影斜  
客中衰鬢已非鴉  
不禁杜宇聲聲苦  
啼盡東風第一花

初七日出黃州道上遇雨

董越

初旭輝輝暎旆旌  
馬蹄蹀躞望東行  
看山未久還蓑笠  
始信春無三日晴

雨滴松根如夜漏  
雲蒸山腹似朝炊  
來

歧已綠鶯花老春  
去行人尚未知

悠悠馬騎催明發  
道上牛車已沒牽  
林



深鳥語似笑人連叫數聲泥滑滑  
古道羊腸驚百折興人十步九蹉跌水  
濱木末憶少陵此語似緣今日設  
行人跛鼈出後先新路鮎髻更沫涎望  
煙疑與前驛近却是燒畬人種田  
平生不識行路難東來況值多晴乾泥  
塗今日何所似百丈牽船上急灘

道旁初見耕水田

道上潢污沾馬足原頭青草沒牛蹄十  
年迢遞鄉關夢今日初看輓負犁

奉和董先生黃海道中苦雨六絕

癡雲林外拂霓旌瘦馬衝泥緩轡行旭  
日籠煙翻作雨長途何用卜陰晴  
草屋踈籬傍翠微輕煙雨濕見晨炊春  
風着物渾無迹水暖池塘鴨未知  
東行輜重凌晨發忽聽間關車設牽泥  
途况復盤羊腸布襪青鞋愁更滑  
叱御王遵逢九折足板何曾經一跌坦  
途微雨誰驚心西蜀飽看天險設



雨晴空林生野煙碧溪寒溜帶蛟涎老  
農相見還相慰山北山南好種田  
萬里長驅蜀道難青衫蓆帽不曾乾歸  
來巫峽曾經險夢裏還愁過葉灘

次道旁初見耕水田韻

鴨江千里過遼西山草山花送馬蹄獨  
喜前村誰氏子短蓑輕笠謾扶犁

次出黃州道上遇雨韻 許琮

濛濛春雨濕前旌小傘輕輿散漫行  
花綻柳搖看漸異好將詩律了陰晴

青山白屋暎朝暉一帶輕煙濕未炊  
道上時時如見畫尋常過客不曾知  
星軺日日侵晨發安得留公飲投牽  
黃州坂上雨如絲預恐脩途踏泥滑  
馬足凌兢車軸折人間涉世憂蹉跎  
從公如在大道行蓋笠帷輶不須設  
大手文章孰敢先草詞前殿藝龍涎  
自能稽古蒙恩遇誰念蘇卿負郭田  
小雨長途每作難春泥汨汨幾時乾  
馬蹄喜入前山去欲洗塵纓向碧灘



次道旁初見耕水田韻

春渠瀟瀟走平堤兩角吳犍利四蹄  
東作漸看農事殷暮年幽興在耕犁

晚宿鳳山館登環翠樓

王敞

老鳳稜嶒飛不起曳尾垂頭三十里  
畫棟層樓半入雲昏曉煙嵐割青紫  
東連碧海翻鯨波三山點點迷翠螺  
驂鸞跨鶴下僊侶半夜月明聞嘯歌  
雕闌十二轉迢迢四面峯巒攢佛髻  
試將老手親摩挲冷翠淋漓濕衣袂  
東風三月隨輶

車柳條著水芹弩芽巡簷始覺春已暮  
開遍櫻桃幾樹花直北孤城大如斗  
石壁傾頽麋鹿走幾椽茅屋帶斜陽  
一蓬蒿生戶牖乾坤一統歸

皇明此邦秉禮尤輸誠

累朝恩寵殊絕萬年獨奉春王正

天王出震臨皇極每遣儒臣頒

詔勅壁間詞賦多名臣指點從前頗相識  
百年我復趨後塵改元又況當戊申短歌

聊爾紀歲月繼此寧無我輩人



次韻

許琮

蒼山雄雄半空起根盤后土深幾里  
秋露下滴芙蓉青夕陽倒射瑪瑙紫  
高樓風卷幕生波晴光入簾堆煙螺  
嘈嘈天樂墜林杪翠鳳雙舞青鸞歌  
望中瀛海路迢遞鼇岑隱暎如露髻  
飢來正思安期棗與酣欲挹浮丘袂  
雲端不見來颿車金鼎誰與論黃芽  
人間烏兔一瞥眼千歲蟠桃三着花  
玉酒萬斛斟北斗醉眼爛爛青電走

一聲長嘯海天空餘響嫋嫋動窓牖  
皇家熙運開文明玉帛萬國供丹誠金甌海  
嶽無寸兵璿璣曆象頒新正

鼇禁仙客下丹極飛向東藩傳

玉勅霞裾霓佩風冷然握手一笑如舊識恨  
無瀛洲九斛塵此情炯炯何由申相  
逢未幾又相送林鶯啼斷能愁人  
許吏曹黃海道中炮齏具飯余嘉其  
能樂賓也作炮齏以紀之因錄呈用  
博一咲

王敞



野麝適何來茫然觸羅網行厨當玆羞  
價直五千緡庖人鼓鸞刀解剥忽來往  
眼光頗凝眇鼻息尚餘響飜飜肉脫皮  
汨汨血流頽衆酪不盈束一臠大如掌  
當爐沃酒漿入火貫荆杖細切堆瓷盤  
下箸復歎賞愧彼子鵝炙氣味遠相讓  
芻豢何足誇八珍爾為長鄙性厭腥膻  
逆鼻惡魚鱗班龍與此麝略不掛念想  
入口破天荒飽食非勉彊何當事春蒐  
一網盡餘黨豈為窮口腹藉爾供宴饗

曉起辱黃門王先生見示道次炮麝  
古作走筆奉荅蓋亦以嘉主人之禮  
也

董越

行厨具午餉設幕如張網肴玆羅滿前  
費直幾緡緡馬頭見儻俟此事驚已往  
坐久聞庖丁忽鼓鸞刀響白茅藉一物  
瞪目且負頽云是周南麝味美勝熊掌  
解剥既迎刃傳火仍貫杖悠哉賓主情  
樂矣山泉賞芬芳入尊俎下箸忘揖讓  
庖然野水麝未許徒爭長金釐北海膾



石首明州養唯甘久駐人有時勞夢想  
雖能少咀嚼殊覺多牽彊爭如此割鮮  
雋永愜吾黨三驅如有獲更向箕祠饗  
三月七日董越在龍泉館錄似吏曹  
許公足下

次韻

許琮

朝家正渴賢恢恢罩天網黃門中高  
選青錢應萬鏹摛文握鴻筆妙處期  
獨徃千篇供一掃擲地皆有響喬雲  
麗層霄咫尺瞻

堯顙使星動瑤墀卿月輝金掌天風吹珮環  
萬里玉節杖海嶠入豪談煙霞助清  
賞觴豆勞行驂示我以禮讓陽坡草  
蒙密赤吏此生長剗心忽登盤飴餽  
雜枯養鳳臠與龍炙應起仙厨想薄  
物信腥膻一撮真為疆尊前一握手  
情親似鄉黨但取誠意耳兔首亦可  
饗

初八日自龍泉館東行見水濱一石  
壁儼如屏狀

董越



路出清灣見石屏東風亂點雨苔青煉  
餘五色憐媧女移近三韓感巨靈濯垢  
豈勞南澗水凌空宜勒北山銘憑君更  
假如椽筆記我星軺此日經

次韻

王敞

龜甲懸空列錦屏好山不盡眼中青江  
分赤壁天垂險鼇戴方壺地効靈金谷  
紫絲開步障商巖鳥篆見盤銘憑誰移  
入東都去更與中郎寫石經

次韻

許琮

懸崖萬丈似圍屏陰雨長垂薜荔青  
泉竇鎔銀通海眼雲根積鐵壓坤靈  
欲磨雷煥騰龍劒擬刻華陽瘞鶴銘  
駐節夷猶回一眄為煩鴻筆入圖經  
安城館午飯許吏曹獻雉作魚脩雉  
蓋吏曹蒼鶻所獲者因作鶻邀雉壹  
章以旌之

王敞

有雉有雉健且雄奇毛五色雙顏紅草  
芽皆短漾新碧旭日翩翻荆棘叢鞞鷹  
脫手誰能縛振翮凌風入寥廓老拳直



欲碎豺狼此物安能供大嚼蕭蕭林壑  
寒生威雉兮破膽還低飛頭垂已覺目  
光眩翅短翻嫌肌肉肥醵身直下便推  
擊白日空原驚霹靂試將玉爪聊爬搔  
碎首穿胷血猶滴判書日日開玳筵欲  
將野味誇新鮮紅盤捧出錦毛亂把翫  
口角還垂涎斯首曾聞歌炙兔折頂誰  
知出甘瓠禮稱執贄唯斯禽猶介由來  
似韋布毼毛入手勞細燂搗椒傳火還  
加鹽飴盤數脰切寒玉入口餘香薰老

髯賓筵洗盞謾酬酢美味何曾說脾臄  
東行指日搖歸旌此地盤桓須再約蒼  
鶻懸知才出羣海東千里搏青雲不貪  
似識判書意前身可是庶將軍

三月初九日江東王啟書

承示鶻邀雉佳作用次奉荅董越頓

首司諫王公同事

董越

朝飛有雉聞雉雄文采煥爛晴霞紅濛  
濛山霧濕欲落振羽已離深樹叢虞人  
幾度懷束縛原野蕭蕭正恢廓臂上蒼



鷹未脫條草中珂馬猶銜爵鷹兮一奮  
擊搏威移時落羽驚紛飛惟知眼底空  
花亂忘却山中野豕肥相催豈待鼓頻  
擊掩耳不遑愁霹靂雲邊殺氣朝稜稜  
空裏血光寒滴滴獲來已足充賓筵野  
水何須更擊鮮炙肉庖丁未沾口朶頤  
童子先流涎三穴曾聞避狡兔原頭逐  
草空槃瓠得似高飛一奏功行厨几案  
驚班布湯浮蟹眼毛已燂盤出水晶更  
着鹽題品已歸司諫手芬芳更落參軍

髯瓠葉詩篇歌獻酢行蒿佳肴說脾臄  
主人好客似當時嘉會何曾待期約未  
行先已念離羣憑謝江東樹與雲迢踈  
謾憶江都相俊逸須懷王右軍

三月十日在縣之館漫錄

次韻

許琮

山狂谷狠北風雄野火照天天為紅  
枯枿宿莽燒痕黑春雨一洗皆芳叢  
材官力健虎可縛醉眼茫茫天宇廓  
平生最喜呼野鷹獨騎寶馬金勒爵



虬髯鬚髻顧眄威馬蹄逐逐如雲飛  
雙雙嬌雉羽離褊原頭飲啄春正肥  
一片白雪恣所擊晴空萬里驚霹靂  
綵翼墜地錦離披寒血隨風雨點滴  
金閨日日賜瓊筵烹龍炮鳳窮芳鮮  
仙庖玉羞難罄名世人聞之流饒涎  
今年持節到玄兔行厨冷落唯葡萄  
忽見綵雉一隻至錦檐繡襦盤中布  
立命厨人付湯燂塗以蜀椒加吳鹽  
為愛野味屢下筯欲題句子時掀髯

此物亦足供酬酢尊前莫恨無脾臆  
人生會合自有數此生此會難更約  
開懷劇談鉅罪屑爛醉狂歌聲徹雲  
窮歡正可追韓張惜無阿買張吾軍  
渡大定江憩江亭草酌三首 王啟  
錦纜橫拖岸輕撓不受風江山空濶處  
煙樹有無中野燒回新綠林花破小紅  
安期如見訪鶴馭穩凌空

海味時供饌江魚旋作羹幽亭臨斷岸  
釣艇繫前楹淑景薰人困澄波照眼清



半生山水癖對此更含情  
素幔迎風颭方舟帶纜牽參湯匙刺盞  
茶竈日烘煙覽勝添詩興看雲欲晝眠  
江湖蕭散意誰似老夫便

次韻

許琮

雀舫橫官渡穩乘破浪風春歸飛鳥  
外天濶落帆中岸柳和煙碧巖花浸  
水紅金刁看斫膾放筯玉盤空  
既無雲子飯又乏月兒羹把酒思兼  
味看山倚畫楹襟期如水淡詩思抵

冰清他日重来此悠悠不盡情

湖山閑作伴詩酒慣相牽江燕飛衝  
雨沙鷗去破煙松枝初鶴睡桑葉未  
蠶眠晚覺滄洲興唯應老漸便

杜鵑花

王敞

杜鵑口中血染作枝上花東風盡吹破  
焰焰如朝霞岡巒靄蒼翠照暎當日斜  
脂唇淡櫻顙鵲頂明丹砂殘粧含酒暈  
玉膚籠絳紗俗呼暎山紅其名良可嘉  
去年事西蜀小亭啜椿芽忽聞杜鵑啼



潛然淚如麻其聲實哀怨其狀如老鴉  
訴苦頻嗷嗷不異華林蛙今春過朝鮮  
到處逢奇葩其色令人愛其聲令人嗟  
聲色反覆間憂喜遠相差無乃倦行役  
經年客天涯可喜一過目不覺度歲華  
可憂一入耳翻然苦思家憂喜良在心  
微物誰能加茲行頗不惡三月還星槎  
便當渡遼水不似凌三巴題詩聊記異  
博物慙張華

次韻

許琮

奔峭臨蒼灣爛熳開雜花最愛紅杜  
鵑染出層城霞露衰色淡佇風擺枝  
橫斜火翻焦僥旗顚包勾漏砂姑射  
玉雪膚隱約紅暎紗隔溪遙見之立  
馬成歎嘉正似碧海底珊瑚新茁芽  
去春住村莊山雨如懸麻青林花事  
晚禿樹空啼鴉寒聲夜未歇草池暴  
鳴蛙朝來忽放晴漫山開新葩手揀  
最繁枝插帽還咨嗟筋力能幾何賞  
心易成差今年乘官驛遠在鴨水涯



芳歲坐荏苒慘然傷物華男兒志遠  
遊肯復念其家但恐名不立老形來  
侵加春光正欲暮千里還使槎老鵲  
哭煙樹聲聲如岷巴臨鸞不用照雙  
鬢應成華

連日途次雅意譯者多不能通彼此  
誠不能無悵然處近復來傳用樂一  
事極知諸君克體

賢王愛客之誠但吾輩之辭誠亦有說恐  
譯者復蹈前轍鄙意莫通因成一詩

錄去將

命諸君子惟亮之可也

董越

宮懸久矣撤宸旒為屬

先皇遏密秋風草固應同遠邇管絃何必雜  
歌謳閑情讓與司空慣禮度曾如東國  
優自古初筵歌秩秩無過主獻與賓酬

次韻

許琮

鑾坡學士侍珠旒正是承

恩俾直秋身在青雲方穩步賦裁白雪摠  
堪謳四知伯起清貧甚三策江都學



業優不許紅裙來佐酒只將文字為  
賡酬

屢承

賢王遣官接宴間携女樂遠來以盡樂賓  
之情雅意曷承但

天子在諒陰中人臣遠使外藩豈宜當此  
正使董內翰已作詩邵之子因席上  
口占二律用示諸君子工拙皆不暇  
計也

王啟

天上龍輿返大羅小臣有淚正懸河星

明

帝座皇恩布

詔賜東藩寵渥多已遣判書供館伴不勞妓  
女舞天魔諒陰況在惇惇日忍使當筵  
連臂歌

望斷龍髯杳莫追傷心黎庶淚雙垂普  
天又喜新頒

詔嗣聖重光又繼離舉國傳呼觀使節當筵  
誰遣用歌姬兩行粉黛須回首繹舉由  
來衆見嗤



次韻

許琮

公館青春宴綺羅  
荒城日暮訪山河  
三行破笑猶無賴  
一部從伶覺謾多  
以禮嚴防真警世  
有詩新格可降魔  
但愁歸採風謠日  
東國無由載樂歌  
明庭玉帛早相追  
歲歲長承

雨露垂虎拜千秋  
曾祝壽

龍飛五位又重離  
觀風海上來周使  
舞雪尊前卻楚姬  
但使廣平腸似鐵  
梅花賦後没人嗤

三月望日成均館謁

宣聖廟

董越

碧山如畫對庭階  
一水環流見聖涯  
漾漾藻芹多士采  
悠悠風月四時皆  
久知道化同元氣  
不異炎荒與雪崖  
仰止仞墻今白首  
坐忘渾未識心齋

坐明倫堂喜諸生進退式禮

子佩青青綠樹陰  
百年

王化被來深文章  
已變西崑體絃管  
應遺太古音  
碧藻春風隨杖履  
扶桑初日暎璆



琳東藩久說衣冠盛聲實相符見自今

次韻三月望日成均館謁

宣聖廟

許琮

聖德如天不可階持蠡欲測海無涯  
詩書一脉源在廟貌千年處處皆  
芹泮春風流碧水杏壇朝日上蒼厓  
青衿多少修葺者燈火伊吾溢九齋  
次韻坐明倫堂喜諸生進退式禮  
森森翠栢滿庭陰涵養菁莪歲月深  
道德但能修孔業詞章不復數唐音

鳳來丹穴皆金羽玉出藍田盡紫琳  
自是

聖朝文化遠藩邦絃誦少如今

謁成均

宣聖廟偶成一律錄似同行諸君子

王敞

廟枕山阿水繞垣百年文教自中原詞  
臣鵠立親頒

詔天子龍飛正改元半壁橋門開講席諸生  
詞賦擬文園莫將小技誇頭角好為尋



師一問源

次韻

許琮

平生寡學穴墻垣聖域那知道大原  
少日焚膏空兀兀老年無術及元元  
王通講道長精志董相傳經不視園  
何幸如今親磬咳欲將洙泗問淵源  
三月望日登漢江樓  
董越

古偏能賦此日慙非筆似扛

是日

國王預遣二承旨於樓中設宴坐見風水  
成文用賦一律

凝睇大江濱樓高礙白雲地山謙受益  
風水渙成文隱約龜鼉窟驚飛鷗鷺羣  
衣冠樂嘉會不覺到斜曛

泛漢江

連艦泛中流蘭橈蕩不休長風翻雪浪  
遠樹眇晴洲帆影尊前落山光鏡裏浮



煙波名利客得似載虛舟

漁舟絡繹獻魚戲詠以荅用博同遊  
臂袒髡蓬擎舟各獻功望迷空碧裏  
心在有無中雨纜閑芳芷煙蓑繫短蓬  
尊前懽受賞絕勝問郢筒

楊花渡

星斗遙隨漢使槎又從古渡泛楊花晴  
洲芳杜迷青柳淺水輕鷗漾白沙十幅  
蒲帆商客棹幾株煙樹野人家長風萬  
里將乘浪咲指扶桑路不賒

晚登望遠亭

日斜猶上最高樓光景流連笑不休堤  
柳嫩含江樹暝渚煙輕逐野雲浮凭欄  
不入平生夢秉燭真成此夜遊歸路火  
城看漸近銀蟾初放海東頭

次三月望日登漢江樓韻 許琮

綉闥雕甍枕碧江坐中風物儘難雙  
鸞奩寒影開千頃蛟室晴光射四窓  
花雨送紅飛野岸松濤搖翠和巖淙  
春來慣作還



朝夢遙向天門望錦杠

玉節駐清瀆鳴騶閑似雲江山供勝  
賞尊酒樂斯文風急搏羊角波翻起  
鴈羣掀髯了詩句遠岫已西曛

次泛漢江韻

倚檻瞰奔流悠悠春事休水通烏鵲  
渚地接鳳麟洲暖日蛟涎長晴空蜃  
氣浮萬人期利涉要待濟川舟

次獻魚韻

往來類轉蓬得雋竟為功小艇蒼煙

外纖鱗綠網中輕風傳畫角微雨濕  
孤篷眼底新詩好相投不用筒

次楊花渡韻

石岸沿回送海槎江光潏潏動菱花  
煙沈別浦迷魚滬風入芳洲漲鴈沙  
桃浪初登四五尺柳陰深暎兩三家  
海門西去蓬萊近始覺乾坤眼界賒

次晚登望遠亭韻

樓船纔下又登樓倚遍雕闌望未休  
山影翠連簾影重霞光紅襯鏡光浮



黃雞不用玲瓏唱金虎還期汗漫遊  
更借飛仙雙玉琯夜深吹上五雲頭  
漢江遊覽偶成五詩錄似同行諸君

子

王敞

斷岸閒登百尺樓青簾盡舫漢江遊杯  
傾漱灩飛鸚鵡鳥送歌聲聽栗留蘇老  
洞簫吹赤壁安期鶴駕過丹丘不須鞭  
石看東海雲樹依稀見十洲  
楊花渡頭春水深蒲芽出水抽瑤簪帆  
檣四塞來萬斛賈客一飯輕千金碧山

靜坐對誰語白鳥忘機知我心此邦百  
年涵

帝澤逼人禮義看駸駸

萬騎沙頭立孤鳶屋角飛江光翻日出  
花氣入簾微酒盞酬還酢江樓坐不歸  
天涯春欲暮便覺賞心違

鳴泉分磴道乳鷺拂江天風定宜催櫓  
潮平好放船深林花眩錦斜日水生煙  
對景償詩債奚囊又幾篇

江轉浪初靜詩成酒半酣金刀看削栗



玉碗喜分柑丘壑真吾癖山川籍客談  
凭欄高着眼勝槩盡東南

晚登望遠亭

花柳春將暮峯巒晚更青楊花橫古渡  
望遠坐江亭海月墮林白山風吹酒醒  
長檠燒絳蠟強飲盡銀瓶  
火樹擎三匝江流更一灣夜游真落魄  
好興未闌珊小艇間漁浦巖城候守關  
東方元未白月色照前山

觀射并喜漁人致魚三首

善射輸猿臂開弦挽角弓可能穿七札  
聊復貫雙熊撫劒匹夫勇封侯三箭功  
老夫元解此羨爾更專攻  
細浪搖青嶂江雲暗碧虛小舟齊曳網  
巨眼試觀魚青鯉還濡沫金刀肯赦渠  
長髯携數尾不愧老為漁  
一鰕剛三寸充盤致一頭餘殃知及爾  
數罟漏吞舟靈沼思春育天池愧遠遊  
微勞希厚賞漁子亦堪羞

次漢江遊覽韻

許琮



萬疊蒼霞聳綠樓，輒時登眺足清遊。  
東風巷陌楊花落，薄暮簾櫳燕子留。  
十二金黿扶畫棟，一雙丹鳳下仙丘。  
望中不覺春潮惡，倒卷魚龍沒舊洲。  
葡萄潑眼碧深深，尊酒從容此盍簪。  
兩使風姿雙白壁，一時文價萬黃金。  
日街鴉影沈雲脚，風送龍腥出水心。  
薄暮溪山儘奇勝，莫教歸騎更駸駸。  
層崖高不極，畫閣似翬飛。  
帆影來滄海，簷牙壓翠微。  
鷗眠知浪靜，鵲老怨

春歸握手輸肝肺，杯行且莫違。  
高樓來萬像，斜日下遙天。  
青瑣風流客，紅絃罨畫船。  
黑鼉吹海浪，白鳥破江煙。  
健筆揮如掣，長篇更短篇。  
郭外無塵事，滄洲趣正酣。  
新茶烹紫笋，春酒釀黃柑。  
麟鳳奇毛羽，魚龍駭咲談。  
異鄉花鳥晚，歸夢大江南。

次晚登望遠亭韻

湖水涵虛白，山容擁帝青。  
鳬舟凌翠浪，蠟燭宴紅亭。  
雲缺蟾光露，風清鶴



夢醒襟期真不淺臨去倒雙瓶

乘槎來萬里星彩動銀灣日照袍光  
麗風微佩響珊珊鷗聲喧水柵鴈影度  
江關海岸晴雷至潮頭湧雪山

次觀射并喜漁人致魚韻

劍士氣如虎能開明月弓官街驅赤  
兔宮苑射黃熊早負穿楊妙將成破  
竹功自憐雙臂軟老病任來攻

浩浩長江水晴光切大虛紅檣飛盡  
鷁綠網罩嘉魚把酒思娛客供厨正

賴渠年年香土裏無計伴樵漁

萬頃寒瑤碧茫茫天盡頭官橋晴曬  
網野渡晚移舟溫水思同釣濠梁今  
更遊江湖負幽夢到此得無羞

題太平樓

王敞

紛紛使節來碧蹄壁間濃墨間留題登  
樓雪霽作長賦倪公筆力凌昌黎文章  
末技吾頗厭大道多歧人更迷若將詩  
句闢工拙甕天小見真醢雞

三月十四日晚眺太平樓次王黃門



韻

董越

長途日日催輪蹄  
風花過眼忘品題  
層樓向晚試縱目  
連覺接棟皆羣黎  
東風滿園桃李放  
落日數峯煙霧迷  
夜深就枕驚一覺  
東方喔喔聞晨雞

次韻

許琮

新詩忽得金褱蹄  
光芒逗日連璇題  
貂蟬肯許續狗尾  
燕石安能償懸黎  
樓臺是處香霧合  
風雨幾家煙樹迷  
春光過眼不容餽  
聽唱白日催黃雞

戶曹鄭判書在大平館與子相處者五日茲當戒行詩以識別

董越

黑髮蒼髯美丈夫  
清談娓娓步于于  
晚風淇水看脩竹  
曉日高岡見碧梧  
侯館詩篇陪使節  
東藩邦計重司徒  
文園病渴偏能賦  
倚馬從人笑鶴癯

詩別鄭戶曹情見于辭

王敞

仗節東藩下鳳池  
已拚五日定歸期  
使軺共識殷負外  
賓館纔逢鄭度支  
牢落蠹魚諳典籍  
清癯海鶴好威儀  
香名為



汝須傳播京國懸知有項斯

三月十八日宿碧蹄館

董越

使華前度驀山溪去意駸駸望眼迷草  
木無情應笑我風光隨處不留題歸裝  
尚擁青油幕去馬仍飜碧玉蹄始信鴻  
飛定遵渚雪泥蹤跡任東西

去日初見梨花歸時搖落殆盡用紀

二絕

去日棠梨葉未舒重來香雪滿庭除

帝鄉回首三千里纔是東歸發轍初

次韻

許琮

郵亭落照蘸寒溪芳草萋萋望欲迷  
玉鳳銜書宣

霽澤蒼虬卷海入新題九天風雨隨龍節萬  
里山河送馬蹄玉署羣賢正相待夢  
魂先到朶雲西

梅子成人草帶舒山禽磔磔響階除  
鴨江波嫩星槎過屈指歸期四月初  
晚宿碧蹄館

王敞

使星昨夜照遼西又喜東還過碧蹄駿



骨垂鞭催驪褭香魂滿地謝棠梨樹綠  
入夏重陰合鳥為留人着意啼青瑣別  
來勞夢想便看通籍步金閨

次韻

許琮

小橋分入路東西又向長亭散馬蹄  
青雨流膏翻翠麥丹霞吹酒上紅梨  
傍簷胡燕迎風舞隔樹班鳩盡日啼  
不負平生張矢志揮鞭寧復念香閨

日昨正使大人戲詠揮鞭萬里  
去安得念香閨之句故及之

重經坡州館午膳

董越

歸路坡州一住驂滿前風物似江南林  
鶯隔樹聲初滑階蟻經春戰未酣躑躅  
猩唇飛冉冉醺醺香雪落毵毵前驅笳  
鼓頻催發鄉思撩人正不堪

次韻

許琮

歸路悠悠暫解驂漏雲斜日照東南  
松梢風入濤聲殷花藥晴薰國色酣  
隔水好山青靄靄撲簾飛絮白毵毵  
傷春自是尋常事送客情深兩豈堪  
坡州館午飯口占二絕聊寓惜春之



意云

王敞

紛紛車騎入坡州為看飛花惹却愁自  
入宦途清興減不將詩酒伴春游  
下馬郵亭待夕曛片時土炕夢梨雲天  
涯滿眼迷芳草春色三分無半分

次韻

許琮

華節東回海上州春歸一夕併生愁  
閑庭點檢花消息且作東風爛熳遊  
徙倚窗櫺日未曛春山燒處起晴雲  
一年光景無多子漲綠掀林已十分

宿東坡館

董越

玄菟地與岷峩隔大蘇此地無行跡高  
門巨扁偶然同草木山川便生色坡陀  
延迤青松陰名按方隅豈自今楊梅不  
是脩家物孔雀元非

宣聖禽山高蒸雲山霧濕來時曾戴東坡笠  
夜深不誦東坡詩地靜恐驚山鬼泣遙  
遙歸路扶桑暎深夜梨花重閉門新詩  
聊與紀遭遇豈同安石閑爭墩

次韻

許琮



玉堂天上風日隔人間無路尋仙跡  
蓮燭搖紅草雲牋

紫皇非常賜顏色才高不數何與陰獨步花  
磚名擅今星槎萬里度東藩海山處  
處聞春禽醉跨金黿浪花濕遠眼茫  
茫天倚笠手拾明月過雲洲千歲老  
蛟水中泣東窮若木見朝暾鸞旌羽  
蓋騰天門離愁萬斛洗難盡呼酒擬  
登阿姥墩  
宿東坡館

王敏

歸心懸

北極乘傳入東坡間竹桃花少漫空柳絮多  
三行中酒聖百戰定詩魔明日開城道  
松陰匹馬過

渡臨津江

渡口臨沙磧江流赴石門銀絲看作膾  
玉乳喜蒸豚野雉供燔炙山花暎酒尊  
扁舟須縱飲斜日照前村

寓宿開城并懷古二詩錄一過以志  
東行之歲月云



刺眼羣峯露碧尖野雲時作雨纖纖開  
城故國曾稱險嵩嶽殊方頗具瞻地控  
三韓惟種織利窮東海只魚鹽品題賸  
有詩千首又恐奚囊笑不廉

荆榛滿眼坐荒臺山擁青蓮次第開閭  
道黃花迎我笑女牆明月為誰來原頭  
麥浪驚風颭樹杪泉聲入夜哀麋鹿不  
知陵谷變松陰時見下城隈

次宿東坡館韻

許琮

薄暮投孤館垣墻接斷坡江聲侵夜

近山色被春多花鳥挑鄉思茶槍戰  
睡魔旆旌從此去何日又重過

次渡臨津江韻

鳥影沈雲渚潮聲隱海門遠風搏野  
馬晴日聚河豚客路山千簇離情酒  
一尊隔江凝望處花柳數家村

次寓宿開城并懷古韻

以寓景  
仰之意一

以敘懷  
古之情

客裏曾看月再尖歸時芳草綠纖纖  
江東見說推王導海外何知識子瞻



萬里行裝伴龜鶴一生勲業作梅蘊  
詩筒日日相來往西子前頭愧隴廡  
十二紅簾七寶臺國亡家破野花開  
荒池蒲長鳬翁沒廢苑煙深鹿女來  
草色晴連山色遠松聲時帶澗聲哀  
一尊不盡登臨恨寒日蕭蕭下岸隈  
金郊館午餉  
董越  
亭午憩金郊初當春夏交花香蜂釀蜜  
樹古鵲成巢入饌先炮雉彎弓不射麇  
紛紛楊柳絮太半落庭坳

次韻

許琮

華屋青山下童童樹影交草深麋解  
角風暖燕爭巢洗盞唯浮蟻行廚只  
供麇輒時成假寐歸夢繞螭坳

過金郊館

王敞

稜稜恠石蹲青草孑孑溪藤綴白花  
苦為睡魔來問候夢隨蝴蝶遶天涯  
松枝築土過溪橋一樹梨花映鵲巢  
合眼便行三十里開城不覺過金郊  
半殼滿盤堆鮓菜四鰓入手膾鱸魚  
庖



人只欲窮滋味藜藿懸知定不如

次韻

許琮

郵亭下馬日初斜閒對庭中一樹花  
自笑老夫餘習在謾將書劍作生涯  
過盡春溪楊柳橋溪邊新綠暗鶯巢  
垂鞭直度前山去數隊紅旌出遠郊  
輕陰漠漠飛絮初野幕臨溪看釣魚  
九十春光今欲盡落花芳草意何如  
過興義口號三絕 王敞

皂帽芒鞋短褐寬肩輿敢謂路漫漫

枚耳畔無呼喚始信黃州好縣官  
赤棒當門二丈夫褒衣緩帶好規模  
須知此輩還遴選秉禮東藩信不誣  
險路今番作坦途每勞脩削費千夫不  
辭四牡駢駢去可恠山頭日又晡

次韻

許琮

望斷平蕪眼界寬寒溪春漲綠漫漫  
莫將此地尋常看曾過

中朝第一官

道上蒼髯老大夫歲寒心事筆難模



一春花鳥爭誇艷莫倚穠華枉自誣  
黃塵車馬倦征途又指前程問僕夫  
紅雨半巖風卷去數聲啼鳥日將晡

金巖即事

王敞

好山入眼便躊躇閑坐清江看捕魚此

景別來應夢想碧天涼月過庭除

右捕魚

水面松橋半里餘不須題柱擬相如前

驅小隊知多少豈羨當年四馬車

右松橋

五色奇毛錦不如可憐狷介昧先幾窮

途釋汝須懷惠好向空山靜處飛

右放雉

掛席平原作布侯當筵較射搃儒流長  
髯老去尤便捷百步紅心中四錐

右觀射

次韻

許琮

肩輿岸上輓躊躇笑看厨人網素魚

可是元龍湖海士半生清興未全除

右捕魚

卧水蒼龍百尺餘霜髯撲簌翠雲如

時從橋上迎星使最愛波涵照客車

右松橋

羅網高張誤觸之為緣啄食蹈危幾



錦衣繡領能招禍莫近平原淺草飛

右放  
雄

班荆草草宴

君侯為愛山前碧玉流白日長空飛霹靂

青山影裏落金鏤

右觀  
射

過安城館

王敞

白白梨華覆短牆青青松蓋午陰涼空  
梁不碍重簾幕一任東風燕子忙  
屋角桃花片片飛天涯誰遣送春歸莫  
言花謝渾無賴柳絮池塘綠正肥

次韻

許琮

樹林生翠暗空墻羃羃嬌雲作晚涼  
坐久東風吹酒醒楊花不管一春忙  
簾幕垂垂燕子飛午窗殘夢聽催歸  
前宵一雨晴來好已覺翻翻麥隴肥

題寶山館

王敞

石面護苔蘚柔根絡蛛絲春花半凋落  
絕巘還參差迢迢赴寶山險路仍攢眉  
斯名義何取令人翻致疑飛螢絕金礦  
照乘無珠池童山鮮良璞恠石苔累累



縱令多寶王安能汚伯夷虛名擅一方  
往往人見嗤辨惑古所貴捉筆題新詩

次韻

許琮

香風吹暖草飛絮紫游絲橫空山偃  
蹇傍水雲參差清幽一區地徙倚久  
軒眉對景但可樂名實何足疑漢宮  
有昆明小石名仇池此類固非一古  
今何纍纍大道本無隔萬事付希夷  
寓言學蒙叟恐為人所嗤愧乏談天  
口局促一篇詩

題葱秀山

王敞

碧山剝落如堵墻劒峯四合還低昂平  
疇十丈開中央婆娑水柳蕪柔桑杜鵑  
花落飛紅香恠石跪伏如貙羊僊凡只  
隔天一方此中好景真異常寒泉徹底  
搖清光飛流直下萬丈長穿崖溜壑何  
奔忙石稜斜闔聲琅琅旌旄三月催行  
裝香塵暗拂羅衣裳垂鞭躍馬臨重岡  
前驅忽報官路傍判書設宴羅酒漿重  
重素幔齊高張只須下馬聊徜徉水涯



列坐排胡床賓主長揖飛霞觴案頭海  
錯陳兩行鰕魚昆布蕪蠟黃不徒膾鯉  
還炮麇漁人舉網游滄浪裸身犢鼻裋  
垂襠探囊不見鱗與魴吹沙箇箇三寸  
長障沙穴地為池塘放之鼓鬣還洋洋  
石門一竇通隙光不覺逸去俱遁藏黃  
州觀察鬚眉蒼探奇好勝不可當掉頭  
急遣黃頭郎捫蘿直上山之陽胡笳斷  
續吹伊涼天風雲外飄笙簧山空谷應  
聞鏗鏘仰面一見喜欲狂須臾情境俱

兩忘不覺老興還飛揚東藩山水如沅  
湘樹頭險路盤羊腸此山秀麗名頗彰  
我來登眺開天荒武陵桃源相頡頏鹽  
車騏驎馳康莊伯樂一顧方知良千金  
價值爭見償蹄翻碧玉看騰驤鬣毛一  
旦生輝光勝游此日不可常歸心千里  
懸

帝鄉玉階午夜隨鵷行五雲深處朝

玉皇螭頭鵠立鳴珮璫敢將樂事窮遐方只  
須短句聊揄揚奚奴收置古錦囊此山



百代還垂芳

次韻

許琮

老氣直壓曹劉牆  
鷄羣野鶴何昂昂  
清晨珂馬朝未央  
觚稜初日瞰扶桑  
龍鑪勃鬱滿袖香  
自公退食如羔羊  
去歲街

命向西方繡斧烜赫

恩非常陳寶碧雞夜有光  
烏道千里縈雲長  
杜鵑啼血送春忙  
巖溜百道鳴璆琅  
山館斜陽促歸裝  
暝翠吹上雲錦裳

碧弩前馳指高岡  
片雲白白飛馬傍  
崎嶇叱馭汗翻漿  
成都石郭中天張  
此地仙翁久相狎  
青牛去後無玉床  
先主祠廟薦椒觴  
參天翠栢知幾行  
赤甲山高西日黃  
白帝城空走麇麋  
巴東峽裏更聊浪  
應有汲婦垂錦襜  
黃魚出浪美於魴  
筒中撥刺身更長  
雲帆如雨下瞿塘  
煙波抹岸眇汪洋  
今年渡海閃星光  
天吳海若驚走藏  
東來最愛葱秀蒼  
山勢雄盤如武當



為臨斷岸呼漁郎澄潭撒網驅浮陽  
潭邊虬松翠蔭涼天籟非絲又非簧  
風來潭面瓊珮鏘助我浴沂風雩狂  
此中之樂不可忘煩君傑筆為稱揚  
吾聞史遷南浮湘西通巴蜀經羊腸  
胷中萬象皆昭彰遠遊更欲窮四荒  
今君奇氣爭頡頏文章不數騷與莊  
藍田白玉素稱良連城價重人爭償  
宛駒汗血如龍驤天閑十二被恩光  
知君才力真超常早歌鹿鳴來

帝鄉儼然端笏立班行羅衫寶帶侍  
虛皇雲路回翔珥貂璫專對才高使四方聲  
名萬里隨風揚東藩山水入詩囊萬  
篇芝蕙傳芬芳

龍泉道中

董越

高山疊石渾如甃穀水錦紋還似皺谷  
風習習黃鳥啼花霧冥冥雄雉雊長天  
落霞舒錦繡荒榛鞠草留巖竇急投舊  
館問龍泉暖氣著人如中酒

次韻

許琮



溪邊亂石青玉甃溪上殘花紅錦皺  
鳥衣掠水飛翩翩彩翼驕春鳴雉雉  
畫角因風殷鐵崖流泉噴玉來雲竇  
踏沙藉草坐移時飲盡床頭一壺酒  
晚宿龍泉許吏曹具行廚水次小酌  
作一詩以紀之

王敞

向晚忽忘倦臨流弄清波平原騁遐矚  
隔岸青山多枯柳當路歧空腹少繁柯  
行廚設帷幔橫亘山之阿漁子適何來  
把釣蹲短莎役夫正喧啾儵魚能見過

有雄鳴且飛冥然罹網羅虞人置我前  
老眼重摩挲朋從遠相喚便欲凌江河  
翹羽頗凋落墮水將柰何暝色垂四野  
星光射銀河潯厓明火樹水底驚龜鼉  
禮飲纔一行便覺雙顏配興來得新句  
首肯時吟哦王事值餘暇况復當春和  
更闌秉燭游緩步除前訶遠遊如不樂  
歲月空蹉跎

次韻

許琮

清溪當驛門鏡平無跳波沙晴鷗鷺



集海近魚蝦多孤樹類楠梓歲久禿  
無柯荒灣色紺寒耿耿沈泉阿有時  
騰紫氣煙雨埋青莎人間一俯仰百  
年如鳥過遼鶴嘆華表海鷗逾新羅  
灞上幾秋風銅狄手摩挲一念凌八  
垓萬里超天河東尋笙鶴侶爾雲遊  
無何相逢一披襟談辨供懸河渴思  
吞滄溟壯欲烹蛟鼉仙觴傾紫霞玉  
貌紅潮配清篇響琳瑯盥手高聲哦  
字法亦神妙鹽紙追永和壁間照奎

彩百靈來撓訶茲遊不可繼世事良

蹉跎

劒水館午膳

董越

小憩傍林花山深日未斜落紅翻蟻穴  
宿蘂亂蜂衙石窟藏蛟蜃泉流閔鑊鉏  
此中有佳氣誰與報張華

次韻

許琮

雨濕驪林花風吹旗脚斜迹留蒼海  
域夢遼

紫宸衙世路危巫峽人情慘鑊鉏莫思身外



事詩酒荅年華

過劒水館

王敞

龍劒雙沈水郵亭獨枕山  
簷牙青嶂合石磴紫苔斑  
倦絮飛纔落孤雲去復還  
長途驅瘦馬應咲白鷗閒

次韻

許琮

拄杖尋芳草開窓入晚山  
柳條蒼蠶蟬霞影錦文斑  
花落經年別人歸何日還  
塵間苦多事回首白雲閒  
日日陪遊清興足矣但相別無幾

思之不覺悵然因以登山臨水送將歸為韻以寄下情謹奉

兩大人求教

許琮

峭壁稜稜疊幾層槎牙老樹蔓寒藤  
殷勤報道溪邊石莫使尋常行客登  
客裏夷猶水石間更揩塵眼向孱顏  
此身恨之垂雲翼不逐飛鸞到玉山  
清流曲曲抱長林晚送寒聲與客心  
隔岸萋萋芳草色歸時何忍獨登臨  
日斜暝色來千里故作人間無恨意



一杯相勸兩何言古來送別臨溪水  
翩翩萬里丹山鳳豈意相歡在伯仲  
遠別天涯恨不支一時送客兼春送  
章貢交流勢自長水雲深處一高堂  
此間定得詩多少莫惜因風遠寄將  
煙波渺渺白鷗飛江左風光天下稀  
海國山川難着眼知公無日不思歸  
承以登山臨水送將歸為韻見贈用  
和荅意

董越

離懷羈思浪層層欲寫應須族刺藤已

似煙波輕泛泛敢辭山路遠登登

僕僕奔馳數月間每勞流水洗塵顏司

空席上已無樂錦瑟從人笑義山

二十餘年忝士林傾葵敢負一生心要

知屋漏還無愧白日青天共照臨

東來使節幾千里祇有風光解人意人

獲五葉不教齊到處長流半江水

平生好客誰題鳳日日竹林來二仲鴨

江冰泮始相逢鶴野風清又勞送

簷花細雨陪夜長亦有新詩題草堂行



行應不笑予矯歸橐蕭然何所將  
草深暝暝花片飛山高落日行人稀  
春光有期思無盡令人到此憺忘歸

三月二十三日在劔水館午餉正使  
董越豪復吏曹許判書足下

次韻

王敞

碧山間上最高層不盡溪毛間葛藤  
別後孤吟應念我小樓明月共誰登  
肩輿緩步白雲間每見林花一破顏  
春色滿前看不厭何須携酒過支山

矮屋前溪隔樹林新槐扶影上庭心  
不緣

紫極新頒詔安得三韓一過臨

神州此去三千里不盡判書留客意  
樓船明日數中流奉餞清江一杯水  
朝陽自昔多鳴鳳口角何曾談管仲  
暫離青瑣來碧蹄千里勞君遠迎送  
幾宵賓館坐更長燕笑憐君共一堂  
今日春愁添別思落花飛絮鳥啼將  
牢落雙鳬海外飛東藩詞賦似君稀  
鴨



江別後還相憶賴有清風伴我歸  
吏曹作七絕預別雋永可愛予因和  
之聊以慰別後之相思云戊申三月  
二十四日江東王敞書於生陽館

皇華集上



皇華集下

黃海道中望海二十韻

王敝

海闊天沈水山危眼倍明東南連巨浸  
西北壯

神京鼇戴三峯出潮通萬壑鳴颶風時  
作陣賈客咲捐生蜃氣秋還歇驪龍睡  
不驚長江限衣帶彭蠡若瓶罌地脉何  
曾斷桑田亦屢更海翁機自息精衛恨  
難平鞭石勞巡幸求仙罷候迎孔門真  
得似坤軸未全傾



聖代誰乘筏清流可濯纓投竿憐尚父伏劒  
笑田橫重譯曾脩貢長風羨耀兵提封  
歸絕域蜚戶樂寬征火樹千株出龍驤  
萬斛輕含沙窺短域破浪吼長鯨濩落  
誰能敵謙卑自不盈幅員環一統險隘  
控孤城  
萬乘臨皇極三辰正玉衡詞臣兼作頌海晏  
與河清

次韻

許琮

春風歸騎健晴日錦袍明鰈域敷

丹詔芝輶返玉京經過饒物色題詠賴詩鳴

綺繡披牋爛雲霞繞筆生看山神即  
爽望海意還驚浦溆通雲竇岡巒剖  
石罌擲筇尋欲遍持蓋僕應更悵憶  
蟠桃老狂思疊嶂平波濤時洶湧鷗  
鷺遠將迎怒轉天疑坼吹翻地訝傾  
誰能傲歌嘯孰擬洗冠纓若木依稀  
想神山縹緲橫蜃樓粧萬象颺母走  
千兵落景涵虛墮孤舟沒遠征漁村  
朝霧細鹽戶晚煙輕安得跨仙鶴無



由膾巨鯨納流真浩汗窺渙歎虛盈  
按節回長道沈吟過古城風光隨橐  
籥形勝盡權衡定有玄虛賦歸時獻  
大清

重登鳳山樓

董越

平原彌一望惟見鳳山州屈鐵松枝古  
連雲麥隴稠橋橫芳草渡人倚夕陽樓  
不有詩篇在真成夢裏遊

予初道鳳山時嘗與黃門王公一登  
斯樓口占一絕遺許吏曹漫不復記

憶又半月予自東國歸乘興再登則  
予詩已加災於木矣念往事恍然如  
夢因再賦此庶不蹈前轍云是歲之  
三月二十四日正使董越又識

次韻

許琮

山形如鳳舞其下有名州古樹寒鷗  
集芳塘落鴈稠開尊同北海乘興上  
南樓鑾殿青綾直應思此日遊

晚赴生陽館

王敏

涓水山分一派來平原極目好懷開金



戈靜擁常蛇陣赤日斜臨戲馬臺泉落  
玉聲通海眼花飛紅雨墮桃腮生陽舊  
館曾分榻此日空庭長綠苔

次韻

許琮

生陽館裏得重來為向東風眼忽開  
雨露潤霑新草樹煙霞長鎖舊樓臺  
花甌翻粟供三桮金錯飛霜薦四腮  
海鶴一聲天欲暮滿階紅素襯蒼苔

重泛大同江

董越

樓船重泛出通津細細晴波漾麴塵翠

柳嫩搖絲裊娜青山倒浸碧嶙峋壺觴  
又勸歸來客詩句難留過去春却訝鳬  
鷗似相識水濱沙際往來頻

次韻

許琮

平蕪淡淡接煙津鏡面澄澄絕點塵  
酒影暖涵金沆瀣山光晴浸玉嶙峋  
四千里路將歸客九十韶光欲暮春  
別後相思眇空濶天涯莫惜寄書頻

次韻

成俔

九臺煙樹蔭平津兩岸沙明不受塵



水鳥街魚穿莽蒼日光翻壁浸嶙峋  
山河久秘千年勝樽酒來尋萬像春  
竣事天涯催返旆五雲雙闕夢應頻

重游大同江

王敞

笳鼓中流載畫船輕陰漠漠思綿綿雲  
迷江廟波千頃沙湧狸巖石一拳却訝  
瞿唐經灩澦又從沮水過朝鮮天涯足  
跡行將遍獨有多聞愧史遷  
平壤須拚半日留春江載酒且重游濤  
聲夜送朝天石花氣晴薰浮碧樓一葉

又乘蘇老興百年常抱范公憂山靈也  
解耽詩句自笑明珠肯暗投

次韻

董越

晴日鷗波好放船正逢江岸柳飛綿壺  
傾渌酒回青眼盤出清冰碎老拳沙脚  
蒲芽抽白嫩波心漁網躍鱗鮮臨流愛  
看春山色不覺令人坐屢遷

東風客路怕遲留底事蘭舟又泝游煙  
暝稀微楊子宅春光蕭瑟仲宣樓蓬山  
謾說無多路尊酒聊憑散百憂豈獨交



情在今日

承明瑣闥分先投

次韻

許琮

江頭重泛鄂君船  
雨後輕寒欲透綿  
樹老荒城鴉接翅  
潮回沙岸鷺聯拳  
墨花吹硯蠻牋濕  
雲葉裁袍獸錦鮮  
此去聲名應更大  
紫樞黃閣賀鶯遷  
星馭迢迢挽不留  
江干輒作泛舟游  
暖香吹落蘼蕪渚  
晴樹斜連沆瀣樓  
白下青門長入望  
金尊綠酒未消憂

臨分織得扶桑鹽雙鳳  
銜梭萬丈投

次韻奉呈副使先生

成覲

五兩迎風穩送船  
長郊草色遠芊綿  
青山倒水螺浮髻  
白鷺蹺沙雪蹕拳  
罌凸金波成細酌  
絲牽紅鯉割新鮮  
莫辭秉燭留連飲  
滄海桑田幾變遷  
為邀旌節且遲留  
奉袂龍門作勝游  
芳草和煙連極浦  
斷雲含雨壓層樓  
乘舟縱趁尋春約  
舉目頻添去國憂  
僻壤欣蒙吐佳句  
羞將木李報瓊投



次韻奉呈正使先生

招招黃帽理歸船  
糝岸楊花亂似綿  
舉網貪看魚掛劍  
煮蔬初薦蕨如拳  
談霏玉麈風生座  
詩拾奚囊錦奪鮮  
邂逅佳期還契濶  
光陰馬上易推遷  
一篙凌波任去留  
擬尋蓬島跨鯨遊  
俯臨河伯千尋鏡  
徙倚元龍百尺樓  
拍岸浪花迷遠望  
隔溪漁笛攪離憂  
蒼然暮色生墟落  
煙暗長林倦鳥投  
過箕子故城有感

王啟

柳暗荒城通九衢  
幾家門巷帶村墟  
井田已廢千年後  
故壘曾經百戰餘  
果下更無三尺馬  
盤中時有八梢魚  
數聲忽聽山陽笛  
滿耳悲風似起予

次韻

許琮

吟鞭撾馬過通衢  
垂柳毵毵蔕故墟  
千里鶯花三月暮  
萬家蠶麥八條餘  
畫橋斜日時聞笛  
茅店臨江盡賣魚  
千古繁華空一夢  
斷煙荒草正撩予

次韻

成俔



馬蹄如雨踏康衢楊柳陰陰十里墟  
畧野雲煙千古恨滿城花鳥一春餘  
閭閻撲地田分井商賈連檣戶有魚  
歲久無因尋往蹟黍離今日正愁予

登風月樓

王敞

愛爾溪頭風月樓短牆獨占林塘幽  
鰲峯海上倚空碧天光水底經年浮  
且容荷葉散青蓋莫打鴛鴦驚白鷗  
元規此日興不淺持盃肯惜相淹留

次韻

董越

東歸無處不登樓獨愛西京百尺幽  
月色滿空當戶入風光四序接天浮  
垂堤翠柳啼黃鳥貼水圓荷戲白鷗  
明日長途又車馬何妨今夕輒遲留

次韻

許琮

芳塘影靜蘸朱樓四擁蒼山草樹幽  
簾藥龍涎香縷細茶翻鷹爪玉塵浮  
東風寂寞唯啼鴉暮雨廉纖不濕鷗  
恠得詩成光萬丈手分奎壁此中留

次韻

成覲



層層簾額捲朱樓樹影環墻院落幽  
紅雨散庭桃已謝青錢點水藕初浮  
岸中占句閑斟茗俯檻忘機坐對鷗  
半日陪遊心未足天教飛雨謾遮留

大同江舟中

許琮

江霧濛濛濕遠裝萬家花柳媚春陽  
龍傾水府明珠爛鼉轉仙山白日長  
但把酒杯酬勝致莫言身世在他鄉  
同

君更盡滄洲趣晚景煙波正渺茫

晚登車門小樓

不是仙都十二樓風光那得許清幽  
如登鶴馭雙雙翼間對鴉鬟萬萬頭  
一派江流何日盡百年塵夢此中休  
杯尊為我須更駐湔却人間今古愁  
次泛大同江韻

董越

奔奔不為促曹裝葵萼丹心戀太陽

楓陞正懷鳴玉遠蘭舟又見引杯長一春花

鳥隨雙佩千里音書滯一鄉幾上層樓  
舒老眼楚雲燕樹兩微茫



次車門樓韻

樹色波光半入樓沿堤一徑更通幽穿

林野雉倂垂翅入網驚麇亂觸頭日用是放

雉割麇事物性謾勞爭巧拙天機元不咲浮

休古今成敗還如此紅粉何曾勝莫愁

復用大同江舟中車門小樓韻錄

奉副使大人求正

許琮

千金不許入歸裝瑞世文章鳳在陽

才似青錢應萬選書抽金匱擅三長

十行

鸞詔頒

皇澤三月鸞花滯異鄉

星馭更回天北去暮雲春樹思茫茫

青山斗絕着危樓最愛春深景物幽

樹杪斜陽明鷺背海門驚浪沒鼇頭

風飄玉屑談初款酒滿金壺飲未休

試向鳳凰臺下望淡煙荒草使人愁

許吏曹惠二詩因次韻以寓惜別之

意

王敞

劍插蒼龍又促裝雨餘林外見殘陽風



流江表非安石放浪天南類子長酒盞  
且償丘壑興江船穩坐水雲鄉與君傾  
蓋渾如舊別後相思意渺茫  
車門高築見山樓柳岸斜通一徑幽虹  
截碧天開雨脚日烘金餅露雲頭水禽  
淺渚鳴相逐埳蟻間階戰不休為報上  
流奇絕處鳳凰臺上散離愁

晚宿安定館

王敞

斜陽林外數歸鴉倦客凭闌忽憶家一  
雨亂披書帶草東風開遍米囊花空梁

乳燕營新壘靜院黃蜂課晚衙懶把詩  
篇破孤悶瓷甌閑試早春芽

次韻

許琮

簾外東風噪晚鴉天涯遊客苦思家  
茶翻雲脚浮銅葉袖拂星芒動劍花  
詩社每輸青玉案客窓長夢

紫宸衙鳳池龍沼春如海紅藥當階已茁芽

赴肅寧館

王敞

驅車赴肅寧征途阻且長青林蔭茅屋  
碧澗懸石梁橫亘鮮平陸盤旋歷重岡



野花泣宿雨箇箇金錢香凭高見華屋  
宛在山中央羣峯若競秀四合如排牆  
移時方入門槐芽茁針芒午餉頗饜飮  
何必羅酒漿登途忽言邁前訶亦翱翔  
遠遊孰云樂艱辛皆備嘗薄暮入安興  
天宇迷煙光

次韻

許琮

晚投肅寧館挾屋蒼山長風蝶入疎  
簾雨燕營雕梁坐久設茶供泉味如  
蜀岡詩妙不敢讀盥手薇露香畢竟

在王上豈但劉中央身佩水蒼玉出  
入紫界墻朝朝書諫紙掃殘雞距芒  
獨承

眷眷隆玉斗分天漿譬如溟海鵬萬里恣飛  
翔風雲許盪胸壯觀皆飽嘗此去擢  
峻除台躔騰奎光

嘉平道中詠石

王敞

嘉平恠石如鐵牛聳肩長跪還垂頭春  
寒不受苔蘚合月夜更同麋鹿游成都  
石笋差可擬蘇老木山應見羞憐渠不



似南宮癖夢裏相看過義州

次韻

許琮

嵌空屹立勞萬牛人百撼之不回頭  
燕然勒銘枉北伐滄溟架橋空東遊  
萬態題來不為寵三品封後還可羞  
超然自無一點累千年留鎮海東州  
迎薰樓觀射

董越

吏曹蒼頭能破的博川健臂亦勍敵兩  
州作倖義少年手挽強弓勁五石未論  
百步解穿楊每見雙鋒能貫革草中豈

無雄白額雲邊正有高飛翼憑君為我  
射歸來夜雨尊前當燔炙建州狂孤方  
假息時聞寇爾疆西北明珠什襲莫輕  
投看爾立功歸絕域

次韻

王敞

布侯高懸中設的猿臂曾誇萬人敵樓  
前角射非徒兒小國官居二千石博川  
赤面鬚髮蒼箭發連珠透犀革定州安  
州好判官陰山曾中雙鵬翼判書帳下  
長髯郎射虎南山剖心炙小技成名輸



爾曹定知百戰無奔北中原藉爾為藩  
籬誓掃逆胡守疆域

次韻

許琮

憶昔少年學射的衆人推我為無敵  
夜深醉過山前村飛箭砮然能入石  
赤手直欲探虎穴壯心常思裹馬革  
胷中磊落萬甲兵指揮風雲開兩翼  
如今老去髣髴然據床猶喚牛心炙  
袖中有劒三千丈半夜龍光照東北  
胡沙不動人熙熙萬歲千秋保鰈域

題孝女金四月詩

王敞

郭山有孝女弱質真淑柔厥親遘奇疾  
良藥空見投屬續恐不免悵然懷百憂  
斷指作肉糜情知拙無謀皇天如鑒臨  
親疾或可瘳倏然諧所願奇功一時收  
孝感理則然不愧庾黔婁嘉名表里閭  
耿耿垂千秋我時過郭山短碣樹道周  
不覺重歎息斯人今在不淳朴散已久  
兒女多鵲鵲

皇風被東藩孝女出海陬題詩上馬去落日



風颼颼

次韻

許琮

有美金氏女稟性慧且柔其親忽抱  
疾蒼黃無處投何由辦良劑五內空  
煎憂肌膚非所惜默默心與謀斷指  
和羹進一嘗病即瘳叩頭謝天公喜  
淚久未收星軺今過海歷通憤溝婁  
到此駐軒蓋問此今幾秋殘碑字欲  
沒蒼山空四周煙樹集慈鴉而無撮  
沙鷗暮霞恣變現落日隱溟陬獨攀

虬松枝寒溜聲颼颼

所串館道中即事

王敞

卉笠長衫擁道傍春盤細簇蓼芽香瓷  
甌滿貯葡萄酒酸吟應便一味涼  
孤館蕭然傍水村兩株老樹正當門春  
芽不為無陽羨獨愛人參一味溫

次韻

許琮

數株官柳野橋傍飛絮紛紛撲馬香  
江雨欲來龍氣黑水風吹作十分涼  
家在江南水竹村鳥啼花落掩柴門



年年奔走東西路坐席何由得輓溫

渡鴨綠江

王啟

水暗長江萬頃秋樓船誰遣候沙頭獨  
憐破浪如飛渡不信投鞭可斷流風颭  
旌旗翻赤熾夜寒戎幕擁青油不須銅  
柱遙分界隔岸人家是義州

晚宿義順館

詔捧金泥過海邦馬頭鼓吹擁旌幢平  
林路杳斜通郭濶埜天低半入江雉巖  
越裳皆効貢表函全蜀盡脩降扶餘咫尺

尺分遼水秉禮由來俗更厖

道中偶成奉東董老先生二首

經綸事業君當任臺閣文章衆所推自  
爾丹心終不變饒他白髮迺相催稜稜  
骨態秋空鶴納納胃懷間世才揔為

先朝成大典節旄三月看東回

毛錐已學萬人敵老手何慚百鍊鋼五  
字長城驅北虜填胷兵甲動西羌校文  
門下三千士曳玉朝端二十霜昨夜奎  
光射東井殊方爭識探花郎



拙詩若干首皆途間遣興之作與吏  
曹周旋許時錄來一看未錄者頗多  
儻欲看再當寫來

次渡鴨綠江韻

許琮

兩岸黃蘆響似秋晴沙堆雪卷潮頭  
源從長白穿山出影浸遙青入海流  
風送螭頭輕泛泛雲隨鳥背去油油  
萬家燈火依稀見此是東藩第一州

次晚宿義順館韻

雙星昨夜向東邦晴霧吹紅上羽幢

兩岸螺青山擁座平堤鴨綠海通江  
詞源浩渺應無底老氣崢嶸未易降  
席上輒成文酒會欲題詩句愧言尾  
次道中偶成韻

平生得力由稽古

眷眷方隆食更推袍織麒麟中使送書裁鸞  
鵲內人催百年禮樂攻周典三策天  
人擅漢才幾度論思香案側許然宮  
燭夜深回

名家舊業自青箱勁節稜稜直似鋼



鯨海乘槎浮析木羊腸叱馭過平羌  
題詩玉紙分奎壁封事皂囊動雪霜  
弱水蓬萊三萬里雲輶穩送羽衣郎

公去歲使蜀故  
有過平羌之語

琮

三月二十五日初拜鴨綠江上

奄忽之間已逾一月矣今還到江  
上臨別不勝悵恨謹錄奉近體各  
三律以寄景仰之情

送別正使大人

許琮

青瑣名臣贊

聖謨飄飄文彩似珊瑚遠遊萬里追司馬直

筆千年繼董狐玉勒官驂金匱匣銀  
牋霜兔墨糝糊東歸揮掃詩多少撒  
盡蛟宮萬斛珠豪氣堂堂獨出頭烏  
紗寶帶儘仙儔天厨曾飽雙雞膳綵  
筆能修五鳳樓星馭更回天北極煙  
波長隔海東州落花芳草江頭路滿  
目青山種種愁長年持橐侍

中宸玉立清班動搢紳仙掌曉分金沆瀣宮  
袍春織繡麒麟細氈論道



天威近綺席題詩墨色新  
文彩風流俱第一  
此生何幸托清塵

送別副使大人

鼎湖

龍去正遙遙五色祥雲麗絳霄  
萬國重瞻暘谷日百川爭赴海門潮  
金雞放赦初宣澤彩鳳承綸遠度遼  
原隰諮詢勞四牡東來隨處採民謠  
青瑣風流第一仙忽承

丹詔動奎躔路從析木天津上  
查泛扶桑弱

天王水邊妙手曾題鸚鵡賦  
新詩閑寫鳳凰牋  
恩風化雨隨雙袖為向東藩萬

李里宣

早向青霄穩着鞭一時才器絕無前  
草成方朔三千牘書破羲之九萬牋  
龍氣衝星雷煥劍虹光貫月米家船  
今年過海詩成集留與人間萬口傳  
七言古風一首奉贈許判書留別

王啟

東藩判書苦業儒風前七尺珊瑚株錦



衣烏帽炫白晝脩眉朗目還長鬚垂腰  
不覺帶金重竦立便知風骨殊賓筵百  
拜閑禮節阼階三揖徐步趨稜稜詩句  
頗絕俗疊疊咲談仍不迂平生自詫能  
藻鑑閱人曾不差錙銖殊方如君豈多  
見雞羣野鶴終自殊

皇明文教被寰宇此邦密邇多霑濡甄陶無  
柰荷

帝力名譽頗能馳海隅

天王出震御宸極

皇華遠遣歌載驅玉堂學士江都相偕  
我千里登長衢扁舟穩泛鴨綠水四牡  
又歷東南隅君臣拜

命頗感激父老稽首多歡娛漢城四牡返旌  
節送迎念汝多勤勛學士剛方慎許可  
直筆萬年凌董狐渡江見汝便相契向  
我歎賞還嗟吁喜君豈但在杯酒心事  
獨憐知老夫空囊曾携一握扇厚橐誰  
贈千金珠沽名斷不為矯激矢心只欲  
懲貪污



明明天子更英斷百辟俯首聆睿謨達聰明  
目決壅蔽聽言納諫追唐虞微官況復  
居

近侍但將清白償一愚不為王適奇男子  
願作孔明真丈夫憶昨東行春欲暮花  
間小隊開行厨錦毛時炙平壤雉銀絲  
細膾松江鱸一房勝槩頗收拾任他山  
鬼頻擲揄須知此樂不可再為憑詩句  
傳畫圖天涯明日便分袂痛飲不辭雙  
玉壺驪駒唱徹江水碧紛紛僕夫俱載

途相思別後對明月清光千里同玄菟

晚赴義順館

王已遣都承旨宋瑛候餞予自抵碧蹄入  
漢城承旨蓋無日不相接見明發渡  
江又欲造送江泚殊不能忘情因作  
一詩留別

王敏

賓館昏黃照火城又勞承旨送歸旌昨  
階不啻能三讓旨酒纔教僅七行始信  
東藩還秉禮須知

中國更推誠碧天新月光如許似為離筵



慘別情

直講申從漢隨許吏曹逆子江上往  
返實月餘矣明日予將渡鴨水而從  
漢迺懇求一詩義不可卻昔景泰改  
元時吾鄉文僖公嘗使朝鮮從漢  
之祖叔舟實為館伴今年予復過此  
而從漢又居執事之列豈吾鄉之人  
與申氏有夙緣邪從漢多讀書善作  
詩賦必能大申氏之族者但恨倉卒  
不能作長歌數洩此意奈何 王敞

命名家有子著先鞭記室才華孰與賢麗  
句閑題鸚鵡賦小詩聊贈薛濤箋碧山  
轉眼隨征旆黃鳥如歌傍別筵年少青  
雲須進步好將勛業擅朝鮮

直長朴增榮索詩識別但歸興浩然  
已在鳳凰之麓方寸擾擾殊無好句  
增榮善趙書偶念及此因以書法告  
之別思俱在所略矣呵呵 王敞

喜爾毛錐早掇科操觚運肘若揮戈詩  
篇好繼唐天寶書法無如晉永和白練



睡餘聊縱筆黃庭寫就謾籠鵝千年心  
畫輪高論轉覺公權趣更多

朝鮮司譯院僉正孫重根字崇本者  
侍余太平館又送至鴨綠江循謹可  
與亦頗解事臨行索詩勉賦以荅

董越

孫郎面頰眼紺碧學得華言在東國  
幾隨琛贄朝虞庭豐草露華霑霑澤

聖明天子出繼離詞臣將

命來東陲仲春纔渡鴨江水不久便賦驪

駒詩太平館裏五日住悠悠已得觀風  
趣清尊曾上漢江樓輕舟亦汎楊花渡  
東南賓主情意濃獨有音聲不可通華  
筵相對坐終日似隔雲山千萬重時時  
賴汝一出口彼此方能一點首桃李春  
風綠幕前梨花夜月黃昏後水母滄溟  
喜得鰕鮓盤周諮從聲牙象胥從古出  
絕域始知今日屬渠家

司譯院僉正孫重根送予鴨綠江上  
因稽首索詩重根謹愿自持殊可人



意作一律以與之

王啟

重譯曾聞貢越裳東藩能事數孫郎國  
音出口成華語巧舌逢人識報章喜入  
九重瞻北極愁經八站過遼陽羯胡近日應  
全遁況有山城傍鳳凰

朝鮮司譯院僉正李生名義字集之  
既逆予於鴨江復侍予於太平館茲  
復送予出境臨別索詩用錄以似

董越

撐犁不解辨陸機楚聲憑羗

去聲人莫知

山川風氣自殊絕方言何處獨無之鴨  
江東去玄菟國密邇遼城非絕域獨憐  
國語出流傳相對使人懷扼塞李生家  
本住開城觀光幾度朝

神京學成鸚鵡圓舌語歸作宮商變調聲我  
來奉使春三月賓主相看似秦越賴生  
時為一相通賓主情懷乃怡悅驅車千  
里送我歸再拜江頭乞賦詩東方琛贄  
正聯絡與生會有相逢時

司譯院僉正李義再拜索詩予與之



相處久固不能忘情因詩以示之

王敞

李生頗淳謹江上遙相從賓筵立朝暮  
竦竦無惰容華語頗諳曉何從解專攻  
仗節來朝鮮渡江入提封國人遠相候  
喔咿聲喁喁賴彼盡翻譯豁愁開心胃  
侍我一月餘時復賜淳醲館伴許判書  
問荅窮詞鋒李生時在傍道達無蔽壅  
託譯李生口有茗金在鎔陳相不善變  
許行非所宗羨爾能喬遷信知非凡庸

鴨江水紺碧似我歸興濃別爾料不遠  
相期在秋冬朝宗還入貢

闕下遙相逢

內醫院主簿曹伸往還從予鴨綠江  
上茲當別去作一詩與之况彼又懇  
求豈容默乎

王敞

讀盡岐黃幾卷書王門好去曳長裾龍  
宮秘洩孫思邈別駕方傳陸敬輿茅屋  
杏花千樹合山房丹竈九還餘相從水  
陸三千里為寫新詩獨贈渠



鴨綠江舟中留別許吏曹 董越

匝月清尊又路歧有情誰不重分離正  
當揚厲鋪張日不是流連倡和時樓倚  
漢江曾赴約山園箕畝亦題詩請看鴨  
綠江頭水東去何曾有盡期

予使朝鮮與吏曹相處者踰月清談  
雅會無日無之茲將別去情實有不  
能相忘者因賦此聊繫別後之思云  
已而吏曹亦索筆書一絕用和荅意  
重上蘭舟話別離相逢莫道更何時簷

花細雨挑燈夜兩地應知有夢隨

臨別情不自勝謹拾荒句錄呈

兩使大人

許琮

青煙漠漠草離離正是江頭送別時  
默默相看無限意此生何處更追隨

次韻

王敞

一尊携手惜分離正是江天欲雨時別  
去前山誰是伴碧油紅幕謾相隨

重過開城望聖居天摩二山 董越

數峯高聳碧天齊俯瞰晴雲落日低黿



背蓬壺凌弱水仙家樓觀絕丹梯長迷  
度海扶搖翼應礙行空蹠蹠蹄安得羽  
翰生兩腋直從絕頂一留題

開城府

繞郭盡人家清流帶白沙松根纔歇馬  
樹杪已聞鴉細柳搖青線新蒲長白芽  
滿山紅似火開徧杜鵑花  
青山斜帶郭東國有遺都歲月驚流水  
風雲憶壯圖長空孤鳥沒落日野猿呼  
牖戶纏綿意從今更將茶

三月十一日渡臨津江遇雨

細雨臨津渡斜風亂石磯渚鷗輕泛泛  
汀樹遠依依入饌江魚美充盤野蕨肥  
主人留客意惟恐薄言歸

二十日重渡喜晴

青山環綠水旬日兩經過柳暗迷旌旆  
花明豔綺羅酌泉偏覺爽鼓枻已聞歌  
欲泛星槎去其如日暮何

宿金岩館

金岩山館裏午餉憶來時飛燕斜穿幕



遊蜂亂養脾風光重顧盼花片已離披  
無限撩人意燈前一賦詩

過興義館不入六言八句

去日曾勞厨傳歸時不駐驂駢自笑日  
征月邁誰云昔是今非黃鳥休鳴伐木  
行人方賦式微屈指韶光能幾東風花  
片飛飛

過安城館不入

午煙吹散樹風微猶憶東行日未西當  
戶遠山雙髻出隔林好鳥一聲啼江山

已變歸來色桃李還成舊日蹊欲索冰  
漿消渴思奔奔無奈促輪蹄

生陽館

生陽枕山麓前峯逼而陡地位限方隅  
其來亦云久層樓四虛敞不待開戶牖  
雪月與風花懸知四時有所少在夾輔  
如人縮右手堪興家有說為問君憶否  
龍長要居左虎短宜在右二者畢竟無  
有水亦足取依大蘇石鼓文叶此館一西顧有  
水來巖竇始知造化機不獨解藏垢石



中有寶玉此理願君剖

安定館

衝泥出平壤帶雨投安定藤蔓掛枯枝  
煙花落林暝來時曾午憩過眼漫不省  
同行老判書指點說風景沈沈動春酌  
燈前亂人影更進山參糕文食松花餅  
西京觀察使索記屢延頸正苦吟思慳  
二事又兼併譬如逢白戰不暇持寸楳  
幸能守廟謨頗不怯鋒穎堂堂陣可布  
肅肅軍再整但恐老兵家笑人馬徒騁

頽然就一覺東風吹夢醒

重過肅寧館

山色如城繞畫樓重來風景豁人眸春  
歸碧樹閑花落暝合空林倦翼投黃犢  
卧雲青草長野蠶成繭綠桑柔催耕布  
穀聲初緩屈指來年又報秋

清川江樓船

曲檻橋橫楯紅亭葉撮蕉蜃樓朝出海  
鼃背夜乘潮柳暗和煙渡花開背櫓搖  
陽春二三月兩度送星輶



三月二十八日自東國歸既渡博川  
薄午又泛大定喜而有作

山水供遊目江湖動客心  
經春雙玉節一日兩清潯  
浪跡真萍梗青山自古今  
自憐非落魄聊此一閑吟

重宿嘉平館

仲春初晦日山館憶停驂  
樹色浮空翠天光動蔚藍  
官程催冀北歸夢繞江南  
使節重經此柔桑已飼蠶

度嘉山嶺

亂石出松根耽耽餓虎蹲  
人行驚白日鳥度怯黃昏  
磬折無方軌天通見一門  
何須怨真宰留取固藩垣

雲興館午餉欲睡不可得

山腰候館落松髯亂石崔嵬亦具瞻  
孝女斷碑橫道左孤城殘堞出山尖  
閑雲片片方隨馬細雨霏霏欲拂簷  
徙倚莫由尋一榻筆花應笑老江淹

宿林畔館夜雨

樹頭樹底斷煙飛  
村北村南共落暉  
燈



影微茫花影亂泉聲隱約漏聲稀沈沈  
良夜重開宴寂寂空庭半掩扉却憶詞  
家留好句一宵風雨送春歸

道中該補者十七首錄奉許吏曹

次重過開城望聖居天磨二山韻

許琮

雙朶芙蓉拔地齊羣山簇簇盡成低  
根連厚土三千軸氣壓層空萬丈梯  
天上有

仙弭羽節人間無路近輪蹄何由鍊筆

蒼崖上為把新詩半醉題

次開城府韻

青青鵲嶺樹往事委塵沙城郭無歸  
鶴園林有亂鴉風輕松落子雨足稻  
抽芽野樹無人主春来自着花  
傷心千古事王氏此為都山水清涼  
國煙雲罨畫圖平田耕犢健深樹恠  
禽呼鰥鰥春原闊如飴是莖茶

次三月十一日渡臨津江遇雨韻

畫艇因風放楊花亂撲磯海霞晴又



暗沙鳥暖相依暮雨蒼茫過春波積  
漸肥朝宗意無盡長向海門歸

次二十日重渡喜晴韻

湖山迎

使節千里此來過宿鷺驚樓舸浮蛆艷  
巨羅東風瓜蔓水斜日竹枝謠會合  
應難又臨流不醉何

次宿金巖館韻

芳辰足可惜清夜坐多時撫事陳今  
古論心出肺脾醉揮金盞側涼索繡

袍披紫氣長衝斗探囊檢舊詩

次過興義館不入韻

千里王程靡鹽東風四牡駢駢溪山  
滿目皆是歲月驚心已非高低野樹  
蒼靄遠近人家翠微隔林斷笛吹破  
一雙白鳥驚飛

次過安城館不入韻

郵亭冷落夕陽微挾路蒼峯盡向西  
草合芳林姑惡怨山深雲木姊歸啼  
揀花時節寒多雨楊柳人家細有蹊



隔岸叢祠簫鼓動賽神應是薦狔蹄

次生陽館韻

華館當道周對面蒼崖陡樓額號生  
陽我來沈思久孔聖衍羲易暗室如  
鑿牖剥盡而七日陽氣地中有聖人  
志扶陽叅贊自有手閉關不省方此  
理君知否請看先天圖始復列左右  
碩果既不食女壯勿用取曩余喜讀  
易燈火處圭竇乃今白紛如韋編墜  
塵垢夢寐伊川翁道妙要細剖

次安定館韻

錦鳩哭煙樹班班雨不定濕雲黑如  
鴟未夕天欲暝落花滿階除紛紛難  
記省春事已闌珊客裏辜佳景公堂  
宴

兩侯畫簾圍燭影風爐細叫蠅活火烹  
鳳餅雄談屑霏霏令我長縮頸胸涵  
幾滄海簇簇萬像併詩家五字城一  
勝可制挺三危有瑞露淨洗管城穎  
戲墨恣揮掃森森鸞鵠整筆勢不可



當萬里天駒騁一讀香在口爽然春  
酒醒

次重過肅寧館韻

門前下馬獨登樓煙景茫茫動遠眸  
古木蒼灣乳鴈下夕陽荒戍亂鷗投  
滿身晴翠山光活入面春紅酒力柔  
擬約羣仙遊汗漫赤明龍漢度千秋

次清川江樓船韻

春寒猶峭料呼酒倒三蕉草色東西  
路江聲早晚潮黿沈鷺肩翮鵬擊看

漢輶  
扶搖此去銀河近悠悠送

次三月十八日自東國歸既渡博  
川又泛大定喜而有作韻

無人空四海唯子可論心持節辭青  
瑣同舟汎碧潏幻身塵劫世彈指去  
來今後會應無日悠悠獨醉吟

次重宿嘉平館韻

山館斜陽暮征輶已解驂題詩揮彩  
筆乘興寫雲藍武庫杜元凱秘書虞



世南平生織錦手冰鹽出金蠶

次度嘉山嶺韻

蒼山忽當道率律勢如蹲鵬背遙空闊  
鷗邊落日昏乾文隣北極地理擁西門  
萬古金湯險天教壯塞垣

西門嘉

山嶺一名

次雲興館午餉欲睡不可得韻

郵亭落日獨掀髯西北浮雲礙遠瞻  
衰颯詩班催髣脚曹騰春睡鎖眉尖  
霞翻魚尾紅穿樹山擁鷗鸞翠滴簷

握手尊前情袞袞天涯不覺歲華淹

次宿林畔館夜雨韻

天涯歸夢逐雲飛客裏光陰幾夕暉  
一路溪山花落盡滿簾風雨燕來稀  
春杯浮白香分甕夜燭搖紅影半扉  
惆悵東風無意緒却隨

華節一時歸

奉寄內翰黃門兩先生

平生不分路多岐況是雲霄遠別離  
揮淚一江春盡後傷心千里月明時



如今花鳥渾無賴何處樓臺更有詩  
惆悵東西各自去鳳城他日赴深期  
春江潮落客將離剩水殘山欲暮時  
金馬玉堂天上事平生魂夢亦難隨  
自江上奉別之後心緒撩亂難以  
為懷今因成同知之去謹次舟中  
留別之作以寄下情兩先生亦無  
忘前日陪侍之歡則於琮幸矣  
自江上別去每夜宿荒榛古戍益重懷  
人彼此之情諒無二致初七日午後抵

遼陽途間幸賴無警十一日成中樞繼  
至辱賜和章披讀如見顏色茲使者還  
謹布此聊慰別後之見思不一二日越  
等亦將脂輦矣重會未即令人悵然申  
生乃祖跋語朴生字辭曹生詩俱漫錄  
去到日希分惠之餘不悉四月十一日  
在遼陽越敵同致意吏曹許公足下

江頭一別不勝懊惱成同知來忽有  
佳章見寄足見雅意因次韻奉答以  
為後會之張本云

王敞



皇華集下  
三十九  
碧草江頭暗路歧數枝濃艷贈將離一  
尊祖帳分携處兩岸春潮欲上時落日  
樓船誰載酒空山瘦馬懶題詩看君効  
貢趨

朝日

闕下相逢會有期

寄義州兵馬使曹淑沂

喜爾長髯膽氣麤方州作鎮綰兵符鳳  
山隔岸千峯出鴨水橫江片月孤見說  
沈機能料敵早聞結髮撫平胡海濱一

帝都

統皆王土好整蕃籬衛

朝鮮太醫院承訓郎兼內醫院主簿  
曹生伸從吏曹許判書既逆予江上  
復送至此往還蓋一月餘矣愛其執  
禮知書且通華語將別索予詩謾賦  
以似

董越

文采曾觀

上國光華音通得語琅琅鼎中未必無丹藥  
海上從來有秘方一月衣冠隨使節三



春花鳥入詩囊活人會積陰功厚聽爾  
馳聲向樂浪

吊箕子墓辭

墓在平壤城之西北隅予自東國歸  
取道展拜時風雨淒迷不覺使人有  
泫然意蓋秉彝好德所發非勉強也  
因為辭三章以吊云

雲冥冥兮樹陰雨濛濛兮山深憩驂駢  
兮中路瞻埋玉兮遙岑石粼粼兮苔蘚  
侵一瞻拜兮淚沾襟慨斯情兮曷以不

少間兮古今吁嗟不死兮維人之心  
屹屹兮幽宮胡為兮自東肇我封兮周  
武不我好兮狡童顧瞻遺墟兮禾黍芄  
芄沾丐殊方兮一德同風流千百世兮  
伊誰之功吁嗟三尺兮封土宜崇  
鼓坎坎兮笛聲悠悠酒欣欣兮更進肴  
羞東人報祀兮不爽春秋冀神來遊兮  
慰我夷猶戒我東人兮勿翦松楸留此  
美蔭兮永蔽斯丘吁嗟此外兮亦又何  
求



次韻

王敞

陰夏木兮重陰薙荆榛兮草深望孤墳  
兮何許蔽木蘭兮高岑碑剝落兮霜雪  
侵風蕭蕭兮滌煩襟郊鄩定鼎兮久淪  
沒八條垂教兮以迄于今嗚呼道脉相  
延兮曠百世而同心

瓊臺兮瑤宮紂惡貫盈兮黃鉞載東棄  
老成兮用培克盛女謁兮比頑童故都  
陸沈兮其來荒荒新封肇造兮載振儒  
風海堧向化兮仰厥神功有廟翼翼兮

祀典攸崇

雨冥冥兮江悠悠奠椒漿兮羅珍羞玄  
堂秘兮閱千秋九疇叙兮垂遠猶墓木  
昂霄兮白楊山楸涕淚交橫兮過此山  
丘彼昏不知兮謂我何求

次韻

許琮

幽宮一閉兮城之陰千秋萬歲兮山  
高水深花鳥兮空林雲煙兮重岑樹  
木千章兮斧斤莫侵靈雨兮紛紛神  
飊兮開襟嗚呼不死兮不去情泯默



於古今非宣尼三仁之目兮孰明斯心

平原撫膺兮維子之宮大道不宣兮  
天私于東人兮歌詠兮暨收豎與樵  
童餘澤靡泯兮草木芄芃民淳而俗  
朴兮夫子之風颺敷衽以敬仰兮仰  
千古之元功名與水兮流長德與山  
兮俱崇

雨  
陵谷變遷兮歲月悠悠報事不怠兮  
荃蕙為羞山空月明兮猿春鶴秋靈

之來兮霏霏靈之去兮猶猶行既遠  
而回望雲不散兮長楸嗚呼天地一  
馬古今一丘故國萬里兮往事茫茫  
福此下民兮靈毋他求

遊葱秀山記

自寶山館西行可十里有山焉峭壁懸  
崖下瞰流水蟠松恠石層見疊出乎谿  
研空洞間石齒齒如齟齬點以雨苔翳  
以蔦蘿危而欲墮者幾半斜泐其中若  
分賓主焉流水自北來汨汨出石罅激



射濺沫如跳珠振鷺盤折而東要不知其所止今

天子嗣統予與黃門金陵王君漢英奉

命頒朔來東藩初道此時日已迫暮興人狂奔赴館不可止徒能一顧盼而已夜宿寶山方與黃門道所以適館伴吏曹許判書假譯者道意謂頃者出山麓欲留少憩馬竟不能追徒抱悵快予因問茲山曷名荅曰聰秀遂與黃門定約歸時必一小駐以窮勝槩吏曹喜甚旬日

予二人自東國竣事歸過寶山日未亭午吏曹請赴舊約黃海觀察尹君亦以逆予至遂與偕行至則將事者已設幕道左凡百皆具時三月之二十二日也二君揖予就次當坐惟見一竇豁然餘皆為流幕所障予二人遂舍坐西行數步至湍急處掬清流濯塵纓仰見所謂斜泐若分賓主者其西數峯蒼翠削出如青葱因謂吏曹曰胡不易聰為葱乎吏曹曰唯一時從行者皆趺坐石上觀



漁人取魚有頃聞山顛有笳管聲予意謂谷應黃門曰不然指以示予則二年已凌泐東嶄然獨出之石崖如猿猱狀予二人不覺失笑蓋出觀察意也將就坐幕已移水濱庖人鼓刀剥麕燂炙以獻魚之入饌者大者如指小者如箸咸煦沫可矜予二人遂命譯者決沙引流隨次第所得輒寘其中為一石門聽其自縱移時無一留者因竊誦子產之喜得所景伊川之記養魚自是漁人亦解

予意不復施數罟矣獻酬未既急景已西促肩輿行不數百武見羣峯獵獵東奔如風檣陣馬奇恠百出皆至葱秀而止又喜茲山不獨巧於藏疾且能獨擅其秀而不多讓也夫自剛柔二氣盪摩融結隨勢成形而勝必因人殆有定數茲山之在東國不知其歷幾千萬年徒壁立水濱不為過者所改視亦云久矣乃今倡於吏曹和於予黨使出日之域咸知茲山之易名自予始豈非所謂有



定數歟然予實非假重茲山者使異日  
之繼此而至者多見品題與漢江楊花  
相為伯仲則亦非盡無助矣既遊之夕  
宿龍泉予為記黃門偕吏曹觀察皆有  
詩弘治元年戊申春三月既望賜進士  
及第欽差正使右春坊右庶子兼翰林  
院侍講經筵講官同脩國史章貢董越  
記

風月樓記

風月樓在朝鮮平壤城之東隅前臨通

衢後瞰池水城闔候館夾峙乎東西一  
望巍然如人正襟歛容端坐雖箕踞跛  
倚歌斜四出終莫之能亂朝鮮西京之  
第一勝槩也西京亭館之留亦多矣大  
率皆隨山勢而為向背其於所謂江上  
之清風山間之明月可兼收並蓄而無  
所障蔽則有得有不得者焉斯樓獨能  
兼有之宜其巨扁之留不于他而必于  
此矣歲在著雍涒灘

聖天子以嗣大寶誕告多方越與黃門王君



實有使朝鮮之

命二月晦日道出平壤時陰魄尚未生明東風亦不甚和煦雖聞有是樓竊歎景與人不相值不一登也三月既望畢使事西歸行十日至平壤時館伴吏曹許君復以奉

教送予出境預約西京觀察使成君覲具舟候予大同江上且請南泛入舊城尋箕子遺跡遂解纜自狸巖亂泚水登車門樓循箕子所畫井田溝塗號直路者

自南門入行數里至斯樓

國王已預遣兵曹魚判書於此設燕燭再更乃徹具吏曹觀察亦就次予與黃門凭欄縱觀因竊笑曰斯樓名以風月不亦負乎始者予道此時景與人既不相值茲還車言邁風雨又復淒迷豈造物者於予黨乎少吝雖東方之風月亦恐不廉於取乎嗟夫蘊光風霽月於胷中者周子也吟弄風月而歸者程子也前哲流風洞視千古雖非後人所敢望其



藩牆然囊衣在所當景蕙改在所當懲  
亦嘗奉遺教於是行以求無負於風月  
矣而造物之於人尚爾乎吝惜矧漫不  
加省者乎吾恐今宵良夜耳不得成聲  
目不得成色非徒在予黨以為懔然雖  
斯樓亦必自悼其不獲遇賞音徒負乎  
其為虛明四達矣遂相顧一咲是夜分  
榻樓之東西廂明日觀察因吏曹固請  
為記夫大塊以噫氣鼓盪乎萬物大明  
以無私必照於容光隨所遇而取之無

禁用之不竭前輩固嘗以無盡藏名之  
而在予黨猶不能忘情於不相值者亦  
姑記其時焉爾有與無固不必泥也吏  
曹清明可掬觀察內秀而文皆於風月  
無負者東歸之日重約一登則雖不入  
予黨之賞音而於所謂虛明四達者亦  
庶幾乎其不虛有矣樓初始命名之歲  
月在東國圖誌具之茲可略弘治元年  
歲在戊申春三月二十六日賜進士及  
第欽差正使右春坊右庶子兼翰林院



侍講經筵講官同脩國史章貢董越記

尚友堂詩序

朝鮮有清修好古之士曰許吏曹者嘗作堂數楹額曰尚友一時名能言者既多見於詠歌第未有為之序者今年春予以使

命至其國吏曹實為館伴往還踰月無日不偕三月之晦宿宣川郡之林畔館明發戒行乃以一刺來曰下走遠人雅辱不鄙名堂之什須待序以傳失今不圖則

徒想王堂於天上庸可再得乎予聞而笑曰吏曹欲有及胡不早圖信宿之期恐難卒辦吏曹曰患不屑爾屑則能容半餉乎予因憶初渡鴨綠時始與吏曹相識嘗愛其雍容儀度式禮罔愆自是日與予相周旋未嘗見其有厭數意為詩音律諧暢蕭然出塵間假譯語諮詢古今疊疊忘倦竊意東國有是人決非怠於進脩所能致者今觀名堂之意益信然夫自一鄉一國以及天下古人之



論穀於亞聖有志者未嘗不以是而驗其進脩然人之趨向不同宜其歸亦異其自棄者則以為我於鄉國尚不能矧敢望友於天下自畫者以為我能友於一鄉亦足稱善士矣又奚必以一國天下為由是志日不進於高明趣日淪胥於污下謂今人不逮古人未必不自此始吏曹自少以有志遠大聞於鄉既歌庶鳴上東國策名進士積官至叅政府長六曹偉績英聲傳播人口其善友乎

一國既於是乎驗之茲復得與子黨相周旋則夫所謂友天下者又似乎近之矣然予實非天下士而繆為吏曹所取恐不能逃宋人寶燕石之譏必待其價重連城冠絕玉府者斯友焉又恐率無可致之理斯二者又將焉取衷耶孟子曰子歸而求之有餘師今東國圖書具載古人行迹吏曹咸得讀誦而尚論之宜其識趣之超卓可追蹤乎古人而不愧稱名臣於東國矣然則雖不獲寶夫



連城而姑志喜於燕石庸何傷於尚友  
乎詩固不待序以傳也重吏曹之誼不  
可負於是乎言弘治元年歲在戊申夏  
四月朔賜進士及第欽差正使右春坊  
右庶子兼翰林院侍講經筵講官同脩  
國史章貢董越序

題申汎翁文集後

右申汎翁文集二十卷其孫成均直講  
從獲所輯也汎翁仕朝鮮自右弼善歷  
禮曹判書積官至議政府領議政以功

封高靈君凡一國辭命皆出其手而輔  
養翊贊之功尤多年五十九卒予嘗讀  
先達倪文僖公使東之遼海編見東國  
倡和詩什獨愛汎翁詩格學唐人詞賦  
得騷體文章機軸不出諸大家竊意其  
涵養精進必與年俱故能如此予使朝  
鮮首訪其後得從獲焉始知汎翁當文  
僖出使時年尚未壯而芳潤之漱於藝  
苑者已若是乎其動人宜其終之造詣  
獨能夔出流輩而偃然國華也其致位



通顯垂裕後人良非幸矣況翁平生所作甚多散佚者過半今所存雖止此譬之春林芳葩但得其一二而化工生意固具在矣從獲其實而傳之時弘治元年歲在戊申四月四日賜進士及第欽差正使右春坊右庶子兼翰林院侍講經筵官同脩國史章貢董越題于義州之義順館

朴希仁字辭

朝鮮禮賓寺直長朴生增榮自江上

侍予往還踰一月嘗愛其循雅端謹且善書得松雪遺意臨別來求字因字之曰希仁且為辭以勉之

天地之性維人為貴厥貴伊何五性具備五性之德仁為爵尊舍之則亡養之則存存則為榮舍則為辱欲永其存惟在乎熟聖賢則熟學者則希字爾希仁維其勉之

弘治元年龍集戊申夏四月四日賜進士及第欽差正使右春坊右庶子兼翰



皇華集下  
林院侍講經筵官同脩國史章貢董越  
書于義州之義順館